

說略

彖傳

卷一
三

方輿



刻說略序



昔在甲午乙未之間予端居多暇
案上皮說部書數十種隨手取一
卷諷之以代憲蘇陶日月遇有可
備攷質者苦其性善忘輒取赫蹠
識之以類黏尺二鉅冊上時自哂

其有掌錄而無舌學已離而爲二
十卷名曰說略藏諸笥中中間曾
一屬友人半塾李君糾其錯亂浙
門張君釐其點畫凡再易草始克
成編乙巳自京師請告歸舟敗于
南陽之決河而此書亡矣舊藁尚

存張君處會其人又物故予惋惜
者久之旣而其家從敝笥中檢以
歸予予頗有珠還之喜因念門類
差分涉獵未廣更欲釐正而附益
焉而病復未果僅蕞爲三十卷錄
而存之或謂就一類之中多有缺

遺就數類之中多非關要或按或引可有可亡重言雖連狝而無傷璫事實荒唐而莫辨愛奇自可語怪何爲予亦爽然自疑不能定也兩弟時從旁慫恿梓于家塾以示兒輩自顧無力荏苒數年頃新安

祕書吳君德聚博古通微耽耆佚典偶過金陵訪予探得數卷讀而好之請事剗劂因念曩時排纒之勞與漂沒之感舉以付焉用成其義先是文學朱君君器見而心賞捐貲爲之繕寫刻旣竣迺并記其

說略序
三
所繇如此嗟乎世之閱覽博物君子且囊括昔之爲海爲郭者以大其畜何以略爲顧有如予之好臆而善忘者時探而諷之亦可藉以備丹陽之鈔補河東之篋雖六藝鍵鈴九流津涉原原本本之論未

極于斯至于考驗是非綜校名實兼資前識用廣異聞古今賢喆之用心往往可以概見是在覽者擇之而已若曰斷截弘美組織纖細則予豈敢避偃鼠飲河之誚哉
萬曆癸丑嘉平江寧顧起元書于

遯園之懶真草堂



說略目錄

卷一

象緯

卷二

方輿上

卷三

方輿下

卷四

時序

卷五

人紀

卷六

官儀

卷七

史別上

卷八

史別中

卷九

史別下

卷十

禮藪

卷十一

律支

卷十二

典述上

卷十三

典述中

卷十四

典述下

卷十五

字學

卷十六

書畫

卷十七

李法

卷十八

冥契上

卷十九

冥契下

卷二十

居室

卷二十一

服飾

卷二十二

工考上

卷二十三

工考下

卷二十四

諸志

卷二十五

食憲

卷二十六

珍格

卷二十七

卉牋上

卷二十八

卉牋下

卷二十九

蟲注上

卷三十

蟲注下

說略卷之一

象緯

江寧顧起元太初輯

江寧顧起元

太初

廣雅云天圍南北二億三萬三千五百里七十五步
 東西減短四步周六億十萬七百里二十五步從地
 至天一億一萬六千七百八十七里下度地厚與天
 高等二十八宿間相距積一百七萬九百一十三里
 段成式酉陽雜俎玉格云天地相去四十萬九千里
 四方相去萬萬九千里貝編又云色界天下石經十

萬八千三百八十三年方至地晉天文志云地上去
 天八萬一千三百餘里後漢地理志注周天積一百
 七萬九百一十三里徑三十五萬六千九百七十一
 里張衡靈憲云八極之維經二億三萬二千三百里
 南北短減千里東西廣增千里自地至天半於八極
 地之深亦如之或曰地廣東西二萬八千里五億十
 萬九千八百八步南北二萬六千里河圖括地象曰
 東西二億三萬三千里南北二億三萬一千五百里
 夏禹所治四海內東西二萬三千里南北二萬六千

里淮南子言四海之內東西二萬八千里南北二萬
 六千里水道八千里東極至西極二億二萬三千五
 百里七十五步北極至南極二億三萬二千五百里
 七十五步管子言地四極出水者八千里受水者八
 千里或曰地厚七萬二千二百里下至泉壤第一壘
 上至星天九萬七千二百里下至九幽洞淵上至星
 天一千二百一十八萬里

四時天名春為蒼天夏為昊天秋為旻天冬為上天
 見爾雅九方天名東方皞天東南方陽天南方赤天

西南方朱天西方成天西北方幽天北方玄天東北
方變天中央鈞天見廣雅中央鈞天東方蒼天東北
變天北方玄天西北方幽天西方昊天西南方朱天
南方炎天東南方陽天見淮南子

釋氏所載諸天有四天王天帝釋天夜摩天兜率陀
天化樂天他化自在天梵衆天梵輔天大梵天少光
天無量光天光音天少淨天無量淨天徧淨天福生
天福壽天廣果天無想天無煩天無熱天善見天善
現天色究竟天無邊空處天無邊識處天無所有處

天非想非非想處天日月星宿天常憍天持鬘天堅
首天見因本經又忉利天皸摩夫摩身天梵迦三天
果實三天無造天大善天空處天識處天不用處天
有想無想天見阿含經

道家所載諸天有太黃皇曾天大明玉完天清明何
童天玄胎平育天元明文舉天七耀摩夷天虛無越
衡天太極濛翳天赤明和陽天玄明恭華天曜明宗
飄天竺落皇笳天虛明堂曜天觀明端靜天玄明恭
慶天太煥極瑤天元載孔昇天太安皇崖天顯定極

風天始皇孝芒天太皇翁重天無思江由天上揲阮
樂天無極曇誓天皓庭霄度天淵通元洞天翰寵妙
成天秀樂禁上天無上常融天王隆騰勝天龍變梵
度天平育賈奕天又大赤天無上大羅天見元始度
人經又無景無色鬱單無量天無形清微天無精波
羅摩褥天色水無量億羅天無極洞清上上禪善無
量壽天玄微自然上虛禹餘天玄清上炁那首約淨
天梵行上清炁稽那遏淨天無窮洞虛極上須延天
玄梵玉虛無精無羅迦淨明天無玄元達上靈赤天

大梵元炁離和天無極上虛玉空玄洞寂然天梵無
色上真炁潘羅玄妙天飛梵行真上玄苾謾福德天
雲梵流精中元近懣蔭淳天玄上洞極無崖不驕樂
天大梵玄天元精答愁近蔭天行梵紫虛上元首帶
快見天虛梵上清化靈須陀結愛天上極無景洞微
化應聲天大梵九玄中元阿給道德天行梵元清下
靈炁須遠天極梵洞微九靈炁須帶阿那天無名至
極洞微梵寶天微梵玄天炁帶扇給道德天虛梵天
炁蟬然識慧天空梵中天續元伊擅天太極無崖紫

虛洞幽梵迦摩夷天錄梵自然識慧入天玄梵大行
無景無所念慧天雲梵上行維先何擅天無色玄清
洞微波黎答憩天洞微玄上梵炁阿竭舍那天玄上
祿梵滅然天極色上行梵泥維先若那天見道經
日名朱明一名靈耀一名東君一名大明一名陽鳥
見廣雅一名翔陽見木華海賦方諸山真天呼日爲
圓羅耀外國人呼日爲濯羅耀見真浩義和者帝俊
之妻是生十日浴日于甘泉見山海經鬱儀奔日之
仙鬱儀赤文與日同居見雞跖集日中有三足鳥名

跋烏見漢天文志及五經通義日出暘谷浴于咸池
拂于扶桑是謂晨明登于扶桑是謂朏明至于曲阿
是謂朝明臨于曾泉是謂早食次于桑野是謂晏食
臻于衡陽是謂禺中對于昆吾是謂正中靡于鳥次
是謂小遷至于悲谷是謂晡時回于女紀是謂大遷
經于泉隅是謂高春頓于連石是謂下春爰息六螭
是謂懸車薄于虞泉是謂黃昏淪于蒙谷是謂定昏
日入崦嵫經細柳入虞泉之地蒙谷之浦垂景在樹
端謂之桑榆見淮南子占日法氣形直微起在日上

爲戴青赤氣抱日上小如冠爲冠青赤氣小而交于
日下爲纓青赤氣小而圓交日左右爲紐青赤氣如
小半暈狀在日上爲負皆有喜青赤氣長而斜倚日
旁爲戟青赤氣圓而小在日左右爲珥有軍日旁如
半環向日爲抱背日爲背青赤氣如帶在日四旁爲
璫青赤氣長而立日旁爲直氣成形在日四方爲提
青赤氣橫在日上下爲格日下有黃氣三重名曰承
福人主有喜且得地青白氣如履在日下曰履見晉
天文志

月中嫦娥之說學齋占畢嘗論其妄云漢志黃帝使
羲和占日常儀占月周官注云儀俄二字古皆音娥
毛詩實惟我儀協在彼中河樂且有儀協在彼中阿
太玄經各遵其儀協不偏不頗以是例之儀俄二字
本同音所謂常娥卽常儀也予謂儀之作俄此誠可
據或後人轉寫爲娥弄妃竊藥奔月之說從而傳會
之耳楚詞天問安得夫靈藥不能固藏則其妄已久
又攷之通鑑前編常儀乃帝嚳之四妃是知後人謂
爲月娥者以有常儀占月事而又惑于帝妃之文故

也

月有形無光日照之乃有光日似彈丸月似鏡體或以爲日亦似鏡體見京房占月御曰望舒亦曰織阿見淮南子月中有物婆婆娑者乃山河影其空處海水影亦見淮南子須彌山有閻扶樹月過樹影入月中見佛藏經冬至後月養魄于廣寒宮見東方朔十洲記月宮榜曰廣寒清虛之府見龍城錄月中有兔與蟾蜍見五經通義羿妻嫦娥竊藥奔月託身于月是爲蟾蜍見後漢天文志注有遠飛雞朝往夕還常啣

月中桂實歸于南土見洞冥記月中有桂樹高五百丈又月乃七寶合成常有八萬二千戶修之見雜俎又考佛典言日爲火珠月爲水珠其廣徑各有由旬數皆七寶琉璃所成宮殿日天子月天子居之而道藏經又載日姓張名表字長史日中青帝名圓常元字照龍韜赤帝名丹靈峙字綠虹映白帝名皓鬱將字迴金霞黑帝名澄潛淳字玄綠炎黃帝名壽逸阜字颯暉像月姓文名申字子光月中青帝夫人名娥隱珠字芬艷嬰赤帝夫人名翳逸寥字婉延虛白帝

夫人名弄素蘭字鬱蓮花黑帝夫人名結連翹字淳
屬金黃帝夫人名青營襟字吳定容此等又與釋典
所言異且日月何以有姓氏名字紛紛傳會可爲拊
掌也

王勃益州夫子廟碑帝車南指遁七曜于中階華蓋
西臨藏五雲于太甲楊用修冊鉛總錄以爲晉天文
志華蓋杠旁六星曰六甲太甲恐是六甲按帝車北
斗也太微垣北七星曰北斗魁四星爲璿璣杓三星
爲玉衡漢輿服志聖人觀於天視斗周旋魁方杓曲

以攜龍角爲帝車夏五月建午斗柄指南南方之宿
曰星七星爲賢士明則道化行暗則賢良不起魁下
六星曰三能一曰三台爲天階一名泰階在太微垣
西次二星曰中台爲中階上一星爲公侯下一星爲
卿大夫華蓋七星在紫微垣杠九星柄合十六星在
勾陳上覆蔽大帝之座西臨西方畢宿有五車五星
凡此五車各以五寅日候之金車庚寅木車甲寅火
車丙寅土車戊寅水車壬寅有雲各具其色者賢人
隱其下也以甲寅爲五候之首故曰太甲如云太乙

遁藏意似謂孔子不得居公卿大夫之位而終身遜藏也

周將伐殷五星聚房齊桓將霸五星聚箕漢高入秦五星聚東井五星聚于冀方魏有天下五星聚箕尾安祿山反于燕宋太祖啟國五星聚奎太宗即位五星在奎四星聚柳張而光武興復于雒四星聚尾箕魏文受禪四星聚牛女而元帝中興揚土宋武北伐四星聚奎及西伐秦四星聚井四星聚參渤海始霸四星聚危文宣受終四星聚張周太祖代漢

五星二十八宿皆有異名木星故曰歲星張衡復名曰攝提曰應星曰紀星蓋以木乃東方之精蒼帝之子故以名之火星本曰熒惑廣雅謂之罰星又謂之執法土星本曰填星鄭氏曰填讀如鎮張衡復名曰地候以土義名之耳金曰太白詩又曰啟明曰長庚蓋以先日而見謂之啟明後日而沒謂之長庚又昏見於西方西方庚位故名爾雅又謂明星亦此意也又名火政大皞太爽威星梁星殷星太正營星觀星官星明堂大衰大澤終星大相天浩序星月緯水星

曰辰星北方屬水之故亦有數名曰小正天攬安周
 星細爽能星鈎星鬢星伺星角亢二星爾雅謂之壽
 星以其長於列宿數起於此也氏曰天根爾雅解曰
 角亢下繫於氏猶木之有根也故國語曰天根見而
 水涸房曰天駟天閑以主馬也國語曰農祥晨正以
 立春之日房晨見農有事也然房心尾三星總而名
 之大辰按左傳昭十七年宋曰大辰之墟蓋以正屬
 房心二星故耳郭璞又曰龍星明者以為時候故曰
 大辰心星一名三星具體而言也故詩曰三星在天

注心宿一名大火以三星之中最明之故七月流火
 注云大火西流是也箕星詩稱為南箕晉志又名天
 鷄亦名天津又箕斗總名曰漢津蓋箕乃龍尾斗為
 南斗乃天漢之津梁故云牛星一名牽牛爾雅又名
 星紀郭璞曰牽牛斗者日月五星之所終始故謂之
 星紀又名河鼓荆楚人呼為擔鼓擔荷也女星一名
 娵女娵女之界者也以織婦女工之界故名石氏又
 名婺女虛曰玄枵蓋玄乃黑色虛位正北故云枵猶
 言耗也又曰顓頊顓頊旭也亦以水德位北之意又

曰北陸國語曰天龜故左氏疏曰天龜玄枵別名也
 室星詩稱營室爾雅謂之定郭璞曰定正也作宮室
 皆以營室為正詩曰定之方中作于楚宮是也晉志
 曰一名清廟一名玄宮壁曰東壁又營室東壁總名
 輒觜之口蓋以室四星相對四方如口之故輒觜亦
 名豕韋春秋襄十八年歲在豕韋是也奎為封豕爾
 雅曰降婁以奎主溝瀆之事故名降婁為聚眾胃為
 天倉昴一名大梁一名西陸皆以屬西方之故別名
 鬃頭以其主胡也又名留史記索隱曰留昴也畢星

詩稱天畢爾雅謂之濁郭璞曰或呼為濁以星形名
 也一名四千車參為白虎一名參伐甘氏名鈇鉞主
 殺伐義也井名東井以其義也鬼為榆鬼以義名之
 也柳謂之味郭璞曰味朱鳥之口也按左傳襄九年
 味為鶉火疏曰柳謂之味鳥口也又名鶉火蓋鶉鳥
 名朱乃火色皆屬南方故也又漢天文志什鳥注注
 作喙爾雅曰鳥喙謂之柳翼軫一名鶉尾亦名鳥帑
 注傳襄二十八年裨竈曰歲棄其次而於明年之
 次以害鳥帑注南為朱鳥鳥尾曰帑疏曰人妻子為

帑妻子為人後鳥尾亦鳥之後故俱以帑為言也

凡五星所行所直之辰其國為得位者歲星以德熒

惑有禮填星有福太白兵彊辰星陰陽和其所主人

事者歲主福主大司農主齊吳主司天下人主之過

主歲五穀熒惑主大鴻臚主死喪主司空又為司馬

主楚吳越以南主司天下人臣之過主歲成敗填星

主司天下女主之過太白天主大臣上公大司馬辰星

主刑主廷尉主燕趙主夷狄其盈縮失位元精降于

地為人歲星降為貴臣熒惑降為童兒歌謠嬉戲填

星降為老人婦女太白降為壯夫處于林麓辰星降

為婦人

二十八宿分屬 國朝之郡縣角亢屬河南之開汝

氏屬汝尾屬北直隸之順河真保永隆萬箕屬順河

保斗屬南直隸之應鳳蘇松常鎮廬安太寧池徽廣

和滁揚淮浙江之杭嘉處湖溫江西之吉瑞袁臨撫

建南康廣饒南昌南安贛九江牛屬中都之揚淮江

西之九江浙江之溫湖嚴金衢紹寧台福建之福泉

延汀興邵漳廣東之廣潮南肇高雷瓊廣西之梧女

屬廣東之廣南肇高雷瓊惠福建之建福泉延汀興
邵漳浙江之溫嚴金衢紹寧台廣西之梧州屬山東
之青濟登萊東昌室屬山東之東昌北直隸之大名
河南之彰衛懷奎婁屬交州昂屬北直隸之順德廣
平真保定山西之大同畢屬北直隸之真保山西之
大同蒲屬山西之平澤四川之松藩壘溪參屬山西
之平潞澤汾遼太原貴州四川之順慶松藩壘溪井
屬貴州之普安四川之成都保寧叙潼眉嘉瀘雅永
隆順慶天全陝西之西鳳漢平鞏臨慶延寧洮文雲

南之臨楚激曲武山西之大遼解鬼屬陝西之西鳳
漢平鞏臨洮文四川之馬雲南之臨楚激曲武貴州
之普安柳屬河南一府星屬貴州之銅仁張屬河南
之南陽翼屬貴州之黎平廣西之平南慶潯柳桂廣
東之廉四川之夔湖廣之郴安沔永辰常衡長岳荆
黃德襄武陝西之漢中軫屬四川之平夔陝西之漢
湖廣之靖武襄德黃荆岳長衡常辰永沔安廣東之
廉廣西之柳平慶子觀分野之說如上所屬有一星
而屬數府有二星而共屬一府者况中國則有屬東

夷朔方西域俱無屬或星在南而屬在北或星在東而屬在西其理殊不可解也

瑞星曰景星亦名德星曰周伯星曰含譽曰格澤妖星曰彗星世名掃星曰孛星曰天鋒曰燭星曰蓬星曰長庚曰四填曰地維藏光曰女帛曰盜星曰積陵曰端星曰昏昌曰華星曰白星曰菟昌曰歸邪曰濛星以上見司天考又歲星所生妖星曰天槍曰天根曰天荆曰真若曰天棖曰天樓曰天垣熒惑所生妖星曰天陰曰晉若曰官張曰天惑曰天雀曰赤若曰

蚩尤鎮星所生妖星曰天上曰天伐曰從星曰天樞曰天翟曰天沸曰荆翟太白所生妖星曰若星曰帚星曰若彗星曰竹彗星曰墻星曰棖星曰白藿辰星所生妖星曰天美曰天龜曰天杜曰天麻曰天林曰天高曰端下見京房集星章又歲星之精流為天棊天槍天猾天衝國皇反登熒惑之精流為析旦蚩尤旗昭明司危天攙填星之精流為五殘六賊獄漢大賁炤星絀流弗星旬始擊咎太白之精散為天杵天柎伏靈大敗司姦天狗天殘卒起辰星之精散為枉

矢破女拂樞滅寶繞廷驚理大奮祀見河圖又客星
 曰周伯老子王蓬絮國皇溫星流星有曰地鴈天鴈
 梁星飛星有曰頓頑曰解啣曰大滑曰天刑又流星
 曰天狗見中興天文志

余嘗疑天有五行星有五緯地有五嶽人有五事而
 二十八宿何獨無中央之宿也後觀石氏星經云中
 宮黃帝其精黃龍為軒轅首枕星張尾掛柳井體映
 三台司四季司中岳司中土黃河江漢淮濟之水司
 黃帝之子孫司倮蟲三百六十則固有所謂中宿矣

又按張衡靈憲蒼龍連蜷於左白虎猛據於右朱雀
 奮翼於前靈龜圈脊於後軒轅黃龍於中則是軒轅
 一星與蒼龍白虎朱雀玄武四獸為五矣世之言星
 者惟知四獸而不知黃龍是求之未盡也亦猶民俗
 惟知四時而不知夏之後有土位素問所謂長夏月
 令所謂中央五時取火夏季取槐檀之火也軒轅本
 市垣之星而在張宿之分野分為土德寄王鶉火亦
 由是也

噫氣其名爲風又云騰水上溢故爲霧又云陰伏於黃泉陽氣上通於天陰陽分爭故爲電董仲舒云陰陽之氣上薄爲雨下薄爲霧風其噫也雲其氣也雨乘空而墜風多則合速故雨大而疎風少則合遲故雨細而密淮南子云天之精雷電風雨也又云電激氣也雷以鞭策大戴禮云霜陰陽之炁也陰氣則凝而爲霜王充論衡云雲霧雨之微也夏則爲露冬則爲霜溫則爲雨寒則爲雪雨霧凍凝者皆由地發不由天降蔡邕云露者陰之液也五經通義云和氣精

凝爲甘露河圖云赤水之炁上蒸爲霞曾子云陰陽之氣則爲霧爾雅云地氣發天不應曰霧霧謂之晦釋名云虹陽氣之動也虹攻也純陽攻陰之氣也鄭玄注考靈曜云日旁氣白者爲虹元命苞云陰陽交爲虹霓侯鯖錄云雨氣成虹朝陽射之則在西夕陽射之則在東詩雲漢箋云天河水氣也精光轉運於天

冬至初陽雲出箕如樹立春少陽雲出房如積水春分正陽雲出軫如白鶴穀雨太陽雲出張如車蓋立

夏初陰雲出紫赤如珠夏至少陰雲出叅如水波寒
 露正陰雲出井如冠纓霜降太陰雲出鬼上如羊下
 如蟠石見易通卦驗韓雲如布趙雲如牛楚雲如日
 宋雲如車魯雲如馬衛雲如犬周雲如輪秦雲如美
 人魏雲如鼠齊雲如絳楚雲如龍蜀雲如困見晉書
 山雲草莽水雲魚鱗旱雲烟火涔雲波水見淮南子
 又見呂氏春秋又濯魚雲見相雨書礮車雲見國史
 補卿雲見拾遺記喬雲之色外赤內青見太玄經油
 雲見西京雜記景雲見竹書紀年彫雲見文選三素

雲見道書梢雲見孫氏瑞應圖香雲見拾遺記

八節有八風立春條風春分明庶風立夏清明風夏
 至景風立秋涼風秋分閭闔風立冬不周風冬至廣
 莫風見易緯東北焱風又融風東滔風東南薰風南
 巨風西南凄風西颺風西北厲風北寒風見呂氏春
 秋東北條風東方明庶風東南清明風南方景風西
 南涼風西方閭闔風西北方不周風北方廣莫風見
 廣雅乾不周風坎廣莫風艮融風震明庶風巽清明
 風離景風坤涼風兌閭闔風見服虔注東北炎風南

條風東南景風南巨風西南涼風西颶風西北麗風
北寒風見淮南子初春至夏五日曰花信風梅花風
先棟花風後凡二十四番見歲時記五月落梅風見
風俗通六月黃雀風見風土記九月鯉魚風見提要
錄三月鳥信風五月麥信風見國史補仲秋蓼花風
見月令章句八月裂葉風見洞冥記又雄雌風見宋
玉賦離合風見陸機要覽鄭公風見會稽記上行曰
扶搖風曲上曰羊角風見莊子梅雨後涼風一月曰
舶趨風見瑣碎錄颶母風發時先緩後急曰鍊風見

嶺南錄及番禺雜記八月風曰葡萄風見金樓子又
祛塵風在崑崙山見拾遺記又南風爲凱風東風爲
谷風北風爲涼風西風爲泰風見爾雅春晴日出而
風曰光風秋冬餘風曰緒風見楚詞

謂風曰孟婆舊以爲宋勾欄中語蔣捷詞云春雨如
絲繡出花枝紅裊怎禁他孟婆合皂宋徽宗詞云孟
婆好做些方便吹箇船兒倒轉江南七月間有大風
甚於舶艸野人相傳以爲孟婆發怒按北齊李駒駮
聘陳問陸士秀江南有孟婆是何鄉也士秀曰山海

經帝之女遊于江中出入必以風雨自隨以帝女故
曰孟婆猶郊祀志以地神爲泰媪此言雖鄙俚亦有
自來矣

豳風一之日鬻發二之日栗烈按說文鬻羗人吹角
也其聲悲栗故名鬻栗冬日寒風驟發其聲似之所
以風寒謂之鬻發也吳下田家志引諺云三九二十
七籬頭吹鬻栗正謂風吹籬落其聲似鬻栗與詩意
合論語注栗至罅發之時將墜尤有戰栗之象由是
觀之鬻發栗烈初皆實字而毛已以風寒氣寒言之
蓋影響之見也

集韻凇凍洛也三蒼解詁液雨也其字音送俗曰霧
凇漢書五行志雨木冰亦曰樹介又曰木椽椽卽介
之訛耳寒甚而木冰如樹著介冑也曾南豐集云齊
地寒甚夜如霧凝於木上日出飄滿庭階尤爲可愛
遂作詩云園林初日淨無風霧凇花開樹樹同記得
集英深殿裏舞人齊插玉籠鬢齊地以爲豐年之兆
諺云霜凇如霧凇窮漢備飯瓮然凇之極則以爲樹
介木冰諺云木若椽達官怕蓋寒淺則爲霧凇寒極

則爲木冰霧凇召豐而木冰召凶也

二月杏花雨見提要錄清明爲潑火雨見退齋雅聞
三月榆筴雨見汜勝之書四月薇香雨見李賀集五
月三日留客雨見陸機要覽夏至黃梅雨三月迎梅
雨五月送梅雨見風土記五月分龍雨見續博物志
五月濯枝雨見風土記暴凍雨見爾雅七月洒淚雨
七月六日洗車雨見歲時雜記八月荳花雨見歲時
記九月黃雀雨見提要錄立冬入液雨見瑣碎錄又
旦日雨爲月額雨見金樓子又蜀中以常雨爲爛雨

見侯鯖錄

史皇作書天雨粟燕丹留秦天雨粟呂后時雨粟光
武末年陳留雨粟大禹時雨稻梁武成八年雨黍于
齊梁鯨八年雨黍于薛漢武帝時廣陽雨麥宣帝時
江淮雨穀三日建武三十一年陳留雨穀吳桓王時
金陵雨五穀五代時閩雨豆趙宋南渡後舒城雨米
又雨木實如沐莢子大禹時天雨金三日周成王時
咸陽雨金顯王時櫟陽雨金襄王時雨金于晉秦二
世元年宮中雨金漢惠帝時宮中雨黃金黑錫漢翁

仲孺貧天雨金十斛于其家唐垂拱三年廣州雨金
 王莽時宮中雨五銖錢至地為龜梁惠成七年雨碧
 于郢梁大同中雨雜色寶珠隋仁壽四年陝雨金銀
 花又仁壽二年宮中雨水銀花紂末年雨石魏時鄴
 中雨五色石漢成鴻嘉四年秋信都雨魚長五寸李
 期時雨大魚于宮中皆黃色又赫連鳳朔元年唐光
 啟二年元和十四年皆嘗雨魚元至正二十五年六
 月大都雨魚漢武帝天漢間大雨白鼈晉太始八年
 雨毛于蜀隋開皇六年雨毛于京師如馬尾至三尺

唐神龍二年四月雨毛于鄆熙寧戊申雨白毛于巴
 陵長二三尺紂時天雨血永康元年雨血尉氏後齊
 河清二年雨血于太原唐武德初雨血于突厥貞元
 二十一年雨血于京師隋仁壽中宮中雨花如榆莢
 周秦間河內雨酸棗今酸棗縣是也魏武時河內雨
 栗漢元帝時雨草宋太始四年雨草于行宮唐貞元
 中雨水于陳留大如指長寸許有孔其立如植唐垂
 拱四年三月天台雨桂子旬餘咸通八年下邳雨湯
 殺鳥獸梁髡王十二年齊地雨水廣者六尺漢桓帝

京師雨冰涼張駿二年二月雨冰片如繢宋紹興戊
午太康縣雨冰龜首足卦文皆具

霄雪兩字音義皆異霄字以肖音屑說文雨霓爲霄
徐鉉注訂說文誤以肖爲肖遂爲臆說云霄雪著物
則消此說可笑雪豈有著物不消者乎霰雪與片雪
同一性也霓卽霰也爾雅雨霓爲霄注冰雪雜下謂
之霄雪說文霰稷雪也陸佃云閩俗謂之冰雪今名
濇雪與霰音相近也詩補傳曰粒雪郭璞爾雅注謂
雨雜下也雪初作未成花圓如稷雪撒而下杜子美

詩所云帶雨不成花俗諺云夾雨夾雪也春秋緯曰
盛陽之氣溫暖爲雨陰氣薄而脅之則合而爲雹盛
陰之氣凝滯爲雪陽氣薄而脅之則散而爲霰韓詩
相彼雨雪先集維霰薛君曰霰霰也夏侯孝若寒雪
賦曰集洪霰之淅瀝煥摧磊之霍索謝希逸雪賦曰
霰淅瀝而先集雪紛糅而遂多古詩詠霰云雪花遣
汝作先鋒是也以此證之霄與霰迥不同矣霄以肖
近天氣也楊雄賦騰清霄而軼浮景陶潛詩川滌餘
霽宇霰微霄道書所稱九霄青霄赤霄紫霄絳霄玄

霄之屬與霰霄字音義何啻千里

玄霜絳雪仙藥見漢武內傳周穆王時西王母貢嶠
 州甘霜甜雪廣延國雪霜皆紺碧見拾遺記吉雲國
 有五色露畢勒國亦有五色露見洞冥記水之美者
 有三危之露露之美者有揭雲之露其色紫見呂氏
 春秋王者施德惠甘露降一名膏露一名天酒見瑞
 應圖善飲國人飲卅露云日初出時有露如珠見洞
 冥記又炎帝時有香露崑崙山有朱露見拾遺記
 諺云日出雨落公姥相撲謂陰陽不和也蔡邕曰陰

陽不和則氣爲虹虹見有青赤之色常依陰雲而晝
 見於日衝無雲不見太陰亦不見輒與日相互朝陽
 射之則在西夕陽射之則在東諺云東鸞日頭西鸞
 雨信然大率與霞相映朝霞不出市暮霞走千里是
 也莊子曰陽炙陰成虹禮疏云日照雨滴則虹生蓋
 雲心漏日日脚射雲則虹特明耀異常或能吸水或
 能吸酒人家有此或爲妖或爲祥朱子云既能吸水
 亦必有形質詩謂之蜺蜺其字以虫俗謂之鸞其字
 以魚俗又謂之旱龍依其形質而名之也

今人以返照爲倒景非也司馬相如賦貫列缺之倒
景謂人在天上下向視日故日景倒在地下也陵陽
子曰列缺氣去地一千四百里倒景氣去地四千里
谷永曰登遐倒景如淳曰在日月之上反從下照故
其景倒服虔曰列缺天閃也魏瓘賦凌倒景而將越
莊子言野馬塵埃乃是兩物古人卽謂野馬爲塵埃
如吳融云動梁間之野馬韓渥云窻裏日光飛野馬
皆以塵爲野馬恐不然也野馬乃田間氣耳遠望如
羣羊又如水波佛典謂如熱時野馬陽焰卽此物也

雀餉味雖甘色則白濁其臭如松脂嚼之膠舌甘露
色微紅凝結如脂珠馨香而有酒味食之百竅皆爽
也如醴泉有正味甘而飲之愈疾者若漢中元元年
京師醴泉涌出飲之痼疾皆愈惟眇蹇者不瘳此方
謂之醴泉若唐雲韶殿前穿井得甘泉止謂之甘泉
耳

凡氣自華以南氣下黑上赤嵩高三河之郊氣正赤
恒山之北氣青勃碣海岱之間氣正黑江淮之間氣
皆曰東海氣如員登附漢河水氣如引布江漢氣勁

言明 卷之一
如杼濟水氣如黑狔渭水氣如狼白尾淮南氣如白
羊少室氣如白兔青尾恒山氣如黑牛青尾東夷氣
如樹西夷氣如室屋南夷氣如闍臺天子氣如城門
如華蓋如龍馬猛將氣如龍如猛獸如火煙如白粉
沸如火光夜照人如山林草木如張弩軍勝氣如堤
如坂如火光如虵舉首如覆舟負氣如馬肝如死灰
如偃蓋如偃魚如羣羊羣猪如轉蓬如揚灰如雙虵
如繫牛如飛鳥如决隄垣如壞屋如驚鹿
每見史傳稱百六陽九而不得其說按洪景盧續筆

云以曆志攷之其名有八初入元百六曰陽九次曰
陰七又有陰七陽七陰五陽五陰三陽三皆謂之災
歲大率經歲四千五百六十而災歲五十七以數計
之每及八十歲則值其一然則陽九卽當承百六而
言所謂災歲蓋不止陽九也及攷張世南游宦紀聞
所載王湜太乙肘後備檢則云四百五十六年爲一
陽九二百八十八年爲一百六陽九奇數也爲陽數
之窮百六偶數也爲陰數之窮與景盧所記不同而
甚有理又曰后羿寒浞之亂得陽九之數七赧王衰

微得陽九之數八桓靈卑弱得陽九之數九煬帝滅
亡得陽九之數十周宣王父厲而子幽得百六之數
十二敬王時吳越相殘海內多事得百六之數十三
秦滅六國得百六之數十四東晉播遷十六國分裂
得百六之數極而反於一五代亂離得百六之數三
此所謂應者也舜禹至治得百六之數七周成康得
百六之數十一小甲雍已得陽九之數五而百六之
數九庚乙武丁得陽九之數六不降得百六之數八
盤庚小辛得百六之數十漢明章得百六之數十五
唐貞觀得百六之數二此所謂不應者也又有元二
之厄不可曉或云卽元元也訛而爲二耳又云楊孟
文石門頌中遭元二西夷虐殘孔耽碑元二坎軻人
民相食趙明誠云若作元元不成文理然徧攷曆數
書無之竊謂恐卽入元百六而爲陽九次爲陰九詞
人深晦陽九陰九之語爲元二耳

說略卷之二

江寧顧起元太初輯

方輿上

周禮均人以土圭之法測土深正日景以求地中日
南則景短多暑日北則景長多寒日東則景夕多風
日西則景朝多陰日至之景尺有五寸謂之地中乃
建王國焉則周都潁川陽城所謂地中也草木子云
崑崙天下山之頂也其東面中原也所以江淮河海
水皆東流也其西面西域諸國也自流沙以西水皆

西流也南則吐蕃兩廣水皆南趨也北卽沙漠又天下岡脊至高之處直北虎林至海都木鉢子田地地勢又逐漸而低水皆北流崑崙乃其結頂處四下之簷乃四方之國土考其流水可見道經云海外蓬萊閩苑有五岳靈山一曰廣乘之山天之東岳也在東海之中居九氣青天之內二曰長離之山天之南岳也在南海之中居二氣丹天之內三曰麗農之山天之西岳也在西海之中居七氣素天之內四曰廣野之山天之北岳也在北海弱水之中居五氣玄天之

內五曰崑崙之山天之中岳也在八海之間上當天心形如偃蓋東曰樊桐西曰玄圃南曰積石北曰閩苑居於中元一氣天中焉又按宋沙門慧嚴與南蠻校尉何承天共論華梵中邊之義引周公測景之法謂此土夏至之日猶有餘陰天竺則無也言測景者周公攝政四年欲求地中而營王城故以土圭測景得潁川陽城於是建都土圭長尺有五寸夏至日晝漏半立八尺之表表北之景尺有五寸夏至日晝此爲地中鄭司農云凡日景於地千里而差一寸當

知陽城蓋就此土自爲中耳既有表景豈非餘陰邪故曆有大小二餘增損積算時輒差候明非中也天竺夏至之日日正中時豎晷無影所謂天中承天無所措難文帝聞之乃勅任豫受焉後婆利國人來果同嚴說成光子云中天竺國東至震旦國五萬八千里震旦卽神州之號也南至金地國西至阿拘遮國北至小香山阿耨達池各五萬八千里釋迦方域誌云池名阿那陀答多唐言無熱惱也在香山南雪山北居山頂上池周八百里分出四河各隨地勢而注

一海故葱嶺以東水注東海達壠以南水注南海雪山以西水注西海大海以北水注北海水經云無熱丘者卽崑崙山山海經云流沙之濱赤水後黑水前有大山名崑崙丘扶南傳云阿耨達山卽崑崙山山海經云海內崑崙墟在西北帝之下都方八百里高萬仞十洲記云崑崙崙陵卽崑山也在北海亥地去岸十三萬里此指佛經蘇迷山也故崑崙崙近山則西涼酒泉之地穆后見西王母之所具彼圖經若崑崙遠山則香山雪山之中也河源出焉攷三教所紀以地

理而言雖未必如成光子之說然以水與日景而言參之衆論則崑崙當爲天地之中正天竺大千之界也潁川陽城特中國之中周公宅中圖大必於是求之然未可以盡通方之巨觀耳

爾雅云東方有比目魚焉不比不行其名鰈南方有比翼鳥不比不飛其名鶉鶉西方有比肩獸焉與邛邛鉅虛比爲邛邛鉅虛齧甘草卽有難邛邛鉅虛負而走其名蹙北方有比肩民焉迭食而迭望中有枳首虵焉此四方中國之異氣也廣雅又云東方有魚

焉如鯉六足鳥尾其名曰鯨南方有鳥焉三首六目六足三翼其名曰鷖鮒西方有獸焉如鹿白尾馬足人手四角其名曰獲如北方有民焉九首虵身其名曰相繇中央有虵焉人面豺身鳥翼虵行其名曰化虵此五方之異物也所載之不同如此

伏羲都陳今河南開封府陳州有陵存焉神農都陳同上或曰曲阜晉志曰都陳而別營於曲阜也今山東兗州府曲阜縣黃帝都涿鹿今順天府涿州括地志又曰涿鹿故城在媯州今朶顏之地少昊都曲阜

同上顯帝都帝丘今山東濮州舊有陵碑尚存帝嚳都亳今河南偃師縣唐堯都平陽卽今山西平陽府也有唐城虞舜都蒲坂卽今山西平陽府蒲州夏都安邑卽今山西平陽府夏縣春秋疏曰堯治平陽舜治蒲坂禹治安邑三都相去各二百里俱在冀州蓋九州之冀也括地志又曰自禹至太康與唐虞皆不
易都汲冢書曰禹都陽城漢志曰陽翟乃受封避舜子之所商都亳同上後盤庚遷都亦曰亳者書曰不常厥邑于今五邦蓋自湯至盤庚五遷也祖乙遷景

盤庚復遷于亳周都豐鎬卽今陝西西安府長安縣關中也徐廣曰豐鎬相去二十五里皆在長安南詩曰文王有聲作邑于豐宅是鎬京維龜正之武王成之蓋都豐而遷鎬也又曰都洛陽卽今河南府洛陽縣也太史公曰學者多稱周伐紂居洛邑其實不然武王營之成王使召公卜之居九鼎焉而復都豐鎬至平王乃遷洛公羊傳又曰王城者何東周也成王既卜營洛邑建明堂朝諸侯復還豐鎬蓋以洛居中土故曰京師秦都咸陽卽今陝西西安府咸陽縣故

古蹟阿房宮長信宮俱在此也西漢始都洛陽五年因婁敬說而復遷都長安東漢都洛陽同上魏都洛陽同上諸書或曰長安曰譙曰許昌曰鄴者水經註曰魏因漢祚復都洛陽以譙爲先人本國許昌爲漢之封居長安爲西京遺迹鄴爲王業本基故號五都時一幸焉而吳初居鎮江都武昌卽今湖廣武昌府也後遷建業卽今南京應天府也蜀都成都卽今四川成都府西晉都洛陽同上東晉都建康同上宋齊都建康同上梁都建康同上陳都建康同上元魏初

居雲中卽今山西大同府懷仁縣後遷洛陽同上北齊都鄴卽今河南彰德府西魏都長安同上關中也後周都長安同上隋始都長安以城狹小水醜與蘇威高穎共議移去城北三十里龍首山都焉後煬帝常徙都洛陽爲巡幸故也唐都長安同上梁都汴卽今河南開封府唐都汴同上漢都汴同上周都汴同上宋都汴同上南宋都臨安卽今浙江杭州府元都大都卽今北京順天府時至上都乃宣府之外之地國朝都應天永樂以北平爲行在後爲北京順天府

輿地東界朝鮮境東西二千里東瀕海則朝鮮之外亦濱海也西至嘉峪自嘉峪而西南則爲西域河源葱嶺天竺在焉南濱於海海之南則爲安南占城佛齊暹羅東則爲日本東南則爲大琉球西南則爲淳泥西洋彭亨諸夷北連沙漠則九邊之外東爲會慶府則金上京與女直相鄰地北爲舊開平則元上京越沙漠爲威虜鎮殺胡鎮 成祖北征所至之地南望北斗北則爲和寧元初建都於此自和寧北行四千餘里則爲大澤又東則爲北狄云

戰國策注辨證東西二周詳矣而宋劉忠定元城語錄曰東西二周通封畿宗周鎬京也地方八百里八八六十四爲方百里者六十四也洛邑成周也方六百里六六三十六爲方百里者三十六也二都得方百里者百爲方千里也故詩曰邦畿千里東西長而南北短短長相覆爲千里此周武王時也至幽王時宗周滅所謂方八百里失之矣及平王東遷洛邑則方六百里爾明邵文莊簡端錄又曰昭公二十六年天王入於成周成周下都也王旣入成周矣曷不遂

入王城也子朝之餘黨在焉故也故萇弘之建議城成周也謂之遷都蓋其任怨也大矣非忠之至者其孰能如此或者不知王城成周爲二遂以入成周爲入于京師使遷都之說卒無所歸而弘之忠不白于後世洛誥曰我卜澗水東澠水西是謂王城又曰我又卜澠水東是謂成周嗚呼地之不考乃害于義如此哉均可以補前注也

禹曰天下名山五千三百七十居地六萬四千五百六里出銅之山四百七十六出鐵之山三千六百九十與管子同筦子地數篇地之東西二萬八千里南北二萬六千里其出水者八千里受水者八千里

八埏東少海東南元澤南浩澤西南丹澤西泉澤西北海澤北寒澤東北通澤又八紘東北荒土東桑野東南衆女南反戶西南火土西沃野西北沙所北委羽又八極東北蒼門東開明門東南陽門南暑門西南白門西閭闔門西北幽都門北寒門見淮南子八陵東陵汎南陵息慎西陵威夷中陵朱滕北陵鴈門又加陵溴梁河墳見爾雅九府東方之美者有醫無

閭之珣玕琪焉東南之美者有會稽之竹箭焉南方之美者有梁山之犀象焉西南之美者有華山之金石焉西方之美者有霍山之珠玉焉西北之美者有崑崙墟之璆琳琅玕焉北方之美者有幽都之筋角焉東北之美者有斥山之文皮焉中有岱岳與其五穀魚鹽生焉見爾雅淮南子

周禮職方掌天下之圖以正南荆州其鎮曰衡今名南嶽即舜南巡至於南衡者是也今湖廣衡山縣漢武元封五年巡南郡霍山禮天柱峯遂以南衡遠阻此地亦

名衡山遂號為南嶽今南直六安州至隋復祀於湖廣之衡

山至今不改周禮以正北并州其鎮曰恒山今名北

嶽即舜北巡至於恒山者是也今山西大同府渾源州唐貞觀

間真定曲陽縣恒山忽爾飛石下縣朝廷以地亦名

恒山遂因建祠為北嶽爾雅亦以此為北嶽五代瓜裂宋地又

不至於大同因之以祀到今弘治中兵書馬文升備

奏唐宋之故今京師在北南行以祀恒山為非禮當

復於渾源之恒事下禮部禮書倪岳乃禱曲陽而生

者因執志必可信而神已飛於曲陽遂寢

東嶽廣乘山在東海中南嶽長離山在南海中西嶽
麗農山在西海中北嶽廣野山在北海中中嶽崑崙
山在九海中爲天地心此大五嶽也方壺山在北海
扶桑山蓬萊山沃焦山在東海連石山在東南鍾山
在北海方丈山員嶠山岱輿山俱在大海中豐都山
在九壘之下玄洲在北海中瀛洲生洲祖洲在東海
中鳳麟洲聚窟洲流洲俱在西海中炎洲在南海中
長洲一名青丘在南海中滄海島在北海中高五萬
里皆神仙所居五帝所理中國五嶽東岳泰山羅浮

括蒼爲佐命蒙山東山爲佐理南嶽衡山霍山潛山
爲儲副天台句曲爲佐理中嶽嵩山少室武當爲佐
命太和陸渾爲佐理西嶽華山地肺女几爲佐命西
城青城峩眉蟠冢西玄戎山吳山爲佐理北嶽恒山
河逢抱犢爲佐命玄隴崆峒陽洛爲佐理又三佐命
山青城山天柱山廬山又有十大洞天則王屋委羽
西城西玄青城赤城羅浮句曲林屋括蒼三十六洞
天則霍林蓬玄朱陵總真總玄司真虛陵大妙洞虛
詠真丹山赤水極玄陽明德玄天寶極玄好生上元

天柱司玄昇真化玄貴玄司真容城太王太秀法樂
長耀寶光太上寶玄秀樂長真玉闕寶圭湘真太虛
洞陽隱觀玄真太元大酉華妙金庭崇妙丹霞仙都
祈仙青田大鶴大滌玄蓋朱湖太生良常方會白馬
玄光金華洞光紫玄洞盟皆有真仙主之七十二福
地則地肺仙源玉瑠青嶼崆峒郁木坑武當君山桂
源靈墟沃洲天姥岑若耶溪巫山清遠東白安山馬
嶺鶯羊洞真壇洞宮玉清壇靈源陶山爛柯龍虎勒
溪靈應白水源金精閣皂始豐逍遙東北源鉢池論

山毛公壇九華桐栢平都綠蘿章觀抱犢大面虎溪

元晨德山鷄籠玉峯

在藍田

商谷張公洞長白中條霍

山雲山四明緱氏臨邛少室翠微大隱白鹿天柱大

若巖嶠山西白天印金城三皇井沃壤三十六靖廬

綿竹紫蓋瀘水丹陵守玄靈淨送仙契靜凌虛鳳凰

子真玄性契玄啟玄出谷君平斗山光天眼德尋玄

得一啟靈宗華朝真黃堂迎真招隱紫虛啟聖啟靈

鳳臺東華祈仙元陽東蒙貞陽右皆有仙真修煉之

跡按記事者可謂詳悉矣然滇詔之地碧雞金馬蒼

山洱水勝甲天下又自廣而西山皆聳秀黛碧洞多深窈宏靚寧無仙真總理蓋記者當其時中國版圖未備無所攷證耳

崑崙山一名崑崙君山一名媧宮武當山一名參嶺

普陀山一名梅岑青城山一名天谷大復山一名胎

簪衡山一名芝岡東海一名岱淵岱淵見隨巢子

太史公自叙言著書藏之名山名山藏書自古多有之按穆天子傳羣玉之山阿平無險四徹中繩先王之所謂策府嵩高山記一石室有自然書及飲食九

土文括畧禹禪會稽山一石穴委曲黃帝藏書於此

禹得之又水經注石山有金簡玉字書禹發之得治

水之理吳地記包山中有洞庭深遠吳王夫差使靈

威丈人入洞穴十七日得玉葉上列靈寶經二卷使

示孔子曰禹書也吳越春秋九山東南曰天承山號

宛委承以文玉覆以藍石其書金簡青玉為字編以

金銀禹登衡山有赤繡衣男子自稱玄夷蒼水使者

謂禹曰欲得我簡書知道水當齋於黃帝之嶽禹乃

齋登石簣山果得其文周行天下使伯益記之為山

海經荊州記小酉山石穴中書千卷相傳秦人於此而學因留之梁湘東王云訪小酉之逸典是也武陵記天門山巖中有書數千卷見而不可取伏滔北征皇天塲古陶穴藏書二千餘卷

何仲默二秦志曰自秦入蜀有三谷四道三谷者其西南曰褒谷南曰駱谷從洋入東南曰斜谷從郿入其所從皆殊舊志謂首尾一谷非是其棧道有四出從成和階文出者爲沓中陰平道鄧艾伐蜀由之從兩當出者爲故道漢高帝攻陳倉由之從褒鳳出者爲今連雲棧道漢王之南鄭由之從城固洋縣出者爲斜駱道武侯屯渭上由之此四道三谷者關南之險阨攻取所從來固矣

張翠微考異南嶽有三一衡陽之衡山二廬江之霍山三舒州之灩山漢武帝以衡陽遼曠故移其神于廬江今俗皆號爲南岳又九域志舒州懷寧縣有灩山爲漢之南岳一名天柱山卽漢武帝登灩天柱山是也按廬江古廬子國卽春秋舒國之地張揖廣雅曰天柱謂之霍山地理志曰天柱在廬江潛縣漢武

帝移岳神於天柱天柱亦爲霍山是則霍山與天柱一而已南岳安得三耶首陽山有三一蒲坂二隴西三洛陽論語注以蒲坂爲夷齊所餓之地按考之洛陽者爲是阮瑀吊伯夷曰適彼洛師瞻彼首陽敬弔伯夷謂蒲坂者非也歷山有四一河中府一齊州歷陽縣二冀州四濮州雷澤縣皆有舜之遺蹟翠微考異以濮陽之歷山正舜畊之所塗山亦有四一會稽二渝州三濠州鍾離縣四宣州當塗縣皆立禹廟翠微考異以宣之當塗正禹之娶所則其它皆謬托也

又按禹娶于塗山會稽志塗山在山陰縣西北四十里蘇鶚演義塗山有四一會稽二渝州三巴南舊江州四當塗縣按左氏昭公四年傳穆有塗山之會哀公七年傳禹合諸侯于塗山杜預解並云在壽春東北說者曰今濠州也柳宗元塗山銘序曰周穆遐追遺法復會于是山然則禹與穆王皆嘗會諸侯于塗山矣然非必皆壽春也若禹之所娶則未詳何地水經注江州縣水北岸有塗山南有夏禹廟塗君祠廟銘存焉常璩庾仲雍並言禹娶於此越絕書吳越

春秋乃云禹娶于會稽塗山應劭曰在永興北永興
今蕭山縣也又與會稽志所載不同蓋會稽乃禹會
諸侯計功之地非所娶之國也

會稽臨安金陵三郡皆有東山俱傳以爲謝安攜妓
之所按謝安本傳初安寓居會稽與王羲之許詢支
遁遊處被召不至遂棲遲東山唐裴冕與呂謂等鑑
湖聯句有興衰還尋戴東山更問東此會稽之東山
也本傳又云安石嘗往臨安山中坐石室臨澹谷悠
然嘆曰此與伯夷何遠今餘杭縣有東山東坡有遊

餘杭東西岩詩注云卽謝安東山所謂獨攜縹緲人
來上東西山者是也此臨安之東山也本傳又謂及
登台輔於土山營墅樓館林竹甚盛每攜中外子姓
游集今土山在建康上元縣崇禮鄉載建康事迹云
安石於此擬會稽之東山亦號東山此金陵之東山
也然南史載宋劉劭經始鍾嶺以爲棲息亦號東山
金陵遂有兩東山矣

山海經太行山一名五行山列子作太形則行本音
也河圖括地象云太行天下之脊郭緣生述征記太

行首始河內自河內至幽州凡有八陁崔伯易感山賦上正樞星下開冀方起爲名丘妥爲平岡巍乎甚尊其名太行蓋起韻之誤耳

左傳成公二年晉郤克戰於鞍齊師敗績逐之三周華不注相傳讀不字俱作卜音伏琛齊記引摯虞畿服經不跗之注于水其說甚異而有徵又按水經注云華不注山單椒秀澤孤峯刺天青崖翠發望同點黛九域志云大明湖望華不注山如在水中李太白詩昔我遊齊都登華不注峯茲山何峻秀綵翠如芙蓉比之芙蓉蓋因華不之名也以數說互證之伏氏音不爲跗信矣

蜀山之大家者曰岷山其川曰岷江岷字說文作巒省作岷漢人隸書作汶多與汶相混列子貉不踰汶謂川江也非汶土也殷敬順已辨之史記冉駹爲汶山郡司馬溫公類篇曰汶音岷據史記引禹貢岷嶓旣藝及岷山之陽及岷山導江皆作汶蓋古字通用也三國志蜀後主至湔登坂觀汶水之流王右軍與周益州撫書曰要欲一遊目汶嶺五代史蜀主王建貶

衛尉少卿李綱爲汝川尉徐無黨注汝讀作岷而今
今汝川縣誤呼作問音也

赤壁山乃吳破曹處湖廣赤壁有五漢陽漢川黃州
嘉魚江夏皆有之惟武昌嘉魚縣西南八十里大江
濱北岸烏林南岸赤壁是也唐屬蒲圻故云去縣西
百四十里今屬嘉魚宋謝枋得猶于石崖見赤壁二
字蘇子瞻所遊乃黃州西下津江百步赤壁磯土人
訛爲赤鼻非故地也可謂賦而失實張文潛但知辨
其誤而亦不識此山之名子瞻所遊自名石鍾山也

驩兜崇山今以爲湖廣之慈利縣非也沈佺期詩集
有從崇山向越裳詩其序云按九真圖崇山越裳四
十里杉谷古崇山竹谿從道明國來於崇山北二十
五里合水欹缺籐竹明昧有三十峯夾水直上千餘
仞諸仙窟宅在焉其詩云朝發崇山下暮坐越裳陰
西從山谷變北上竹谿深竹谿道明水杉谷古崇岑
以此證之崇山乃在交廣之域爲是

裴氏廣州記云五嶺大庾始安臨賀桂陽揭陽鄧德
明南康記云五嶺者臺嶺之嶠五嶺之第一嶺也在

大庾騎田之嶠五嶺之第二嶺也在桂陽都龐之嶠五嶺之第三嶺也在九真萌渚之嶠五嶺之第四嶺也在臨賀越城之嶠五嶺之第五嶺也在始安都龐水經注作部龍萌渚輿地志作明諸徐廣曰五十萬人守五嶺淮南子曰始皇利越之犀角象齒翡翠珠璣乃使尉屠睢發卒五十萬爲五軍一軍塞罽城之嶺一軍守九疑之塞一軍處番禺之都一軍守南野之界一軍結餘干之水注罽城接鬱林九疑在零陵番禺在南海南野餘干在豫章其說五嶺又不同

天山雪山祁連山白山四名其實一也明帝紀擊破白山虜於蒲類海上章懷註曰山冬夏有雪故曰白山匈奴謂之天山過之皆下馬拜之又杜詩註天山卽祁連山在伊州一名雪山

昔人文章用北狄事多言黑山黑山在大幕之北宋謂之姚家族有城在其西南謂之慶州沈括云予奉使嘗帳宿其下云山長數十里土石皆紫黑似磁石有水出其下所謂黑水也胡人言黑水源下委高水曾逆流予臨視之無此理亦常流耳山在水之東大

大庾騎田之嶠五嶺之第二嶺也在桂陽都龐之嶠
 五嶺之第三嶺也在九真萌渚之嶠五嶺之第四嶺
 也在臨賀越城之嶠五嶺之第五嶺也在始安都龐
 水經注作部龍萌渚輿地志作明諸徐廣曰五十萬
 人守五嶺淮南子曰始皇利越之犀角象齒翡翠珠
 璣乃使尉屠睢發卒五十萬為五軍一軍塞罽城之
 嶺一軍守九疑之塞一軍處番禺之都一軍守南野
 之界一軍結餘干之水注罽城接鬱林九疑在零陵
 番禺在南海南野餘干在豫章其說五嶺又不同

蒼水澄清魚鱉出役雲集雷興活
 活潑

破白山

昔人文章用北狄事多言黑山黑山在大幕之北宋
 謂之姚家族有城在其西南謂之慶州沈括云予奉
 使嘗帳宿其下云山長數十里土石皆紫黑似磁石
 有水出其下所謂黑水也胡人言黑水源下委高水
 曾逆流予臨視之無此理亦常流耳山在水之東大

抵北方水多黑色故有盧龍郡北人謂黑爲盧水爲龍盧龍卽黑水也

杜少陵愁坐詩云葭萌氏種迥左擔犬羊屯葭萌左擔皆地名葭萌人皆知之左擔人罕曉也按太平御覽引李充蜀記云蜀山自綿谷葭萌道徑險窄北來擔負者不容易肩謂之左擔道也

地志金陵爲古雲陽氏之都按遁甲經云沙土之福雲陽氏之虛也可以長往可以隱處卽今茶陵之雲陽山攷之皇甫紀實爲少昊之封雲陽氏之蹤固在

甘泉甘泉之山本曰雲陽以故黃帝以來每大祀必于甘泉然則長沙之地其亦爲始封乎若丹陽曲阿則秦世之雲陽嶺也吳地記錄曲阿正秦代之雲陽嶺太史時言東南有天子氣在雲陽間秦人于是發赭徒三千鑿雲陽之北岡曲之因曰曲阿則今之丹徒也昔吳岑昏鑿丹徒至雲陽杜野小辛間而陳勳屯田鑿句容中道至雲陽西城則今之破岡瀆也故杜佑以丹陽爲古雲陽而學道傳謂是茅山若絳北之陽石者非其址矣

地有空桑在東窮桑在西歸藏啟筮云空桑蒼蒼八極既張乃有羲和是主日月蓋指隅夷之地故記孔子生于空桑春秋演孔圖云徵在游于大冢之陂夢黑帝謂已汝產必于空桑而于寶所記徵在生于空桑之地今名孔竇在魯南山之穴故孔廟禮器碑云顏育空桑空桑魯北孔子魯人故說者指云空桑南山穴之說已自戾矣若共工氏振鴻水以薄空桑則爲莘陝之間伊尹莘人故呂氏春秋古史攷俱言尹產空桑空桑故城在今陳留固非魯也地記言空桑南杞而北陳留各三十里有伊尹村而所謂窮桑則非此矣拾遺記言窮桑者西海之濱也地有孤桑千尋蓋在西垂少昊之居梁雍之域顓頊繼少昊者故世紀亦自窮桑遷商丘而杜預遽以窮桑爲在魯北至釋例地名乃云地闕故類達云言魯北者相傳言爾蓋以定四年傳封伯禽于少昊之墟逆之而史之所記乃在曲阜又因預而妄之也郡國志云少昊自窮桑登帝位非空桑明矣

蕭何封鄜侯今世家作鄼侯字相似之誤也鄜七何

切班孟堅十八侯銘文昌四友漢有蕭何序功第一受封於鄜又唐詩麒麟閣上識鄜侯按鄜在沛鄜在南陽何起沛封邑必近之且孟堅去何未遠所聞必真師古云何封南陽之鄜疑未深考也

楊用脩以方城爲萬城陳伯晦引史記阻之以鄧林緣之以方城又我悉方城外及服虔杜預之說以正之然不如盛弘之荊州記之明切也其二云葉東界有故城始犍縣東至瀨水達泚陽界南北聯聯數百里號爲方城一謂之長城南北雖無基築皆連山相接

而漢水流其南故屈完云云何其易曉也郡國志葉縣有方城郭仲產曰苦萊于東俱有方城又楚狂接輿耕於方城之南蓋皆傍此長山方城而名者也語云鴈門紫塞地皆在北今人稱北爲鴈塞非也荊州記鴈塞北接梁州汶陽郡其間東西嶺屬天無際鴈飛翥至此卽回翼唯一處稍下每鴈飛達則矯翮裁度下處而過故名鴈塞地在蜀漢間也

錢唐二字其來甚遠按史記始皇本紀至雲夢浮江下丹陽至錢唐臨浙江上會稽立石刻頌秦德西漢

地理志亦有錢唐縣今唐字從土則誤矣蓋以錢易土及捐錢築塘等事皆傳會之辭也

楚章華臺亳州陳父縣陳州商水縣荊州江陵長林監利縣皆有之乾谿亦有數處據左傳楚靈王七年成章華之臺與諸侯落之杜預注章華臺在華容城中華容卽今之監利縣非岳州之華容也至今有章華臺在縣郭中與杜預之說相符亳州陳父縣有乾谿其側亦有章華臺故臺基下徃徃得人骨云楚靈王戰歿于此商水縣章華臺之側亦有乾谿薛綜注

張衡東京賦引左氏傳乃云楚子成章華之臺于乾谿皆誤說也左傳實無此文章華與乾谿元非一處楚靈王十二年王狩于州來使蕩侯潘子司馬督囂尹午陵尹喜帥帥圍徐以懼吳王次于乾谿此則城父之乾谿靈王八年遷于夷者乃此地十三年公子比爲亂使觀從師于乾谿王衆潰靈王亡不知所在平王卽位殺囚衣之王服而流諸漢乃取葬之以靖國人而赴以乾谿靈王實縊于芋尹申亥待他年申亥以王柩告乃改葬之而非死于乾谿也昭王二十

七年吳伐陳王帥師救陳次于城父將戰王卒于城父而春秋又云弑其君于乾谿則後世謂靈王實死于是理不然也

康成以三亳阪尹共爲一事云湯舊都之民服文王者分爲三邑其長居險故言阪尹蓋東成臯南轅轅西降谷也皇甫士安以蒙爲北亳穀熟爲南亳偃師爲西亳蔡註立政用士安說註盤庚又用康成說二書亳同康成說是

載籍中所言地理訛舛甚多姑數其一二漢文帝封淮南長子陽周侯賜爲廬江王應劭曰廬子國廬子國卽廬戎之地按左傳廬戎自在容城山中劭誤以中廬之廬爲廬江之廬矣舜漁雷澤正城陽之雷澤而周處風土記乃以吳之太湖大雷山小雷山爲舜漁之所子胥之胥山在嘉興東南而張晏乃以太湖之承胥二山爲子胥之山李白讀書於匡山正綿州大匡山小匡山之處而寰海記舊註乃指江州匡廬山爲白讀書之所楚之雲夢跨江南北左傳曰王以田江南之夢則知雲在江北而郭璞注爾雅乃以岳

陽巴丘湖為楚之雲夢後漢樊丹封謝陽侯正詩所謂申伯番番既入于謝之謝地也而傳乃以為射陽按射陽在山陽西即漢高祖封項纏之地非丹封地也樊毅碑曰謝陽之孫此可驗也

鄒衍言九州之外復有九州載于史記按其說曰東

南神州曰旦土旦音與晨同正南邛州隋書作迎曰深土西南

戎州曰滔土正西弇州隋書作拾州曰升土正中冀州曰

白土西北桂州曰肥土正北玄州隋書作營州曰成土東

北咸州曰隱土尸子作急土正東陽州曰信土其言本荒

唐漢人作河圖括地象全祖其說隋作郊天遂以其名入從祀之位史炤通鑑釋文曰此九州其崑崙統四方之九州乎或曰神農地過日月之表蓋神農之九州也又按淮南子載九州東南神州曰農土正南次州曰沃土西南戎州曰滔土正西弇州曰并土正中冀州曰中土西北台州曰肥土正北濟州曰成土東北薄州曰隱土正東陽州曰申土與前小異司馬子長自叙云上會稽探禹穴此子長自言徧遊萬里之目上會稽總吳越也探禹穴言巴蜀也後人

不知其解遂以爲禹穴在會稽而作地志者以禹廟旁小坎如春臼者當之按蜀之石泉禹生之地謂之禹穴其石杳深人迹不到明巡撫儀封劉遠夫修蜀志搜訪古碑刻有禹穴二字乃李白所書始知會稽禹穴之誤水經注石泉縣有石紐村禹所生也

唐詩春雲生嶺上積雪在囂間山凹之地堪爲墟市者曰囂尚書序仲丁居于囂其地在陳留浚儀之間秦之敖倉也敖卽囂也三川爲天下之朝市故名曰敖云左傳有囂氏之隧史記注青陽在青之陽玄囂

在玄之囂梁宣帝七山寺賦神囂崑崙而特立仙的皎皎以孤臨皆以囂爲地名也周禮司市之文云禁其鬪囂注鬪以力爭囂以口爭交市之地必多爭故禁之此益可證囂之爲市其義所從來遠矣後世市謂之墟歸市曰趨墟言有人則囂無人則虛也

漢地理志有胸忍縣顏師古注音劬誤也按說文胸腊挺也其俱反字旣從句與地名何干通典作胸臆胸音如順切臆如尹切讀如閨蠢通典之音得之矣而字作胸則因漢志而誤也當從胸乃叶閨字之音

胸臆蟲名夔州地多此蟲遂以爲名又謂胸臆屬漢中亦誤檢地志漢中實無此縣雲安之西三十里萬戶驛下橫石灘上土人云驛之左右胸臆故地也詩曰民之初生自土漆沮齊詩作自杜漆沮言公劉避狄而來居杜與漆沮之地杜水名卽杜陽也據文義作杜爲長耳

銅柱不獨馬援吳黃武二年程普關羽分界鑄銅柱爲誓在衡山縣西北一百二十里又五代晉與楚王馬希範立銅柱爲界學士李臯銘在辰州西北一百十里會溪對又涪陵江口名銅柱灘也

史記齊世家魯伐我入陽關徐廣曰在鉅平括地志兖州博平縣南二十九里西臨汶水唐陽關在安西詩西出陽關無故人是東西兩陽關也

宋潤州丹楊館書從木其屬縣丹陽書從阜或者疑之考晉地理志謂山多赤柳故名丹楊江南地志謂郡北有赭山故名丹陽二說皆有據也抑又考之兩漢丹陽郡治宛陵而丹陽縣則今建康也至移郡治於建康而元帝又徙都焉於是以建康守爲丹陽尹

至唐天寶初始以今京口爲丹陽郡而以曲阿爲丹陽縣然則今潤之丹陽正非漢丹陽之故治也丹陽凡有數處楚鬻熊始封丹陽則在今歸州秭歸縣後楚文王徙都江陵府枝江縣亦曰丹陽漢於宛陵置丹陽郡隋於丹州置丹陽郡唐於京口置丹陽郡其地不一而西漢志乃以曲阿之丹陽爲楚所封誤矣

說略卷之二終

說略卷之三

江寧顧起元太初輯

方輿下

有兩石頭一在金陵一在豫章在金陵者所謂鍾山龍蟠石頭虎踞王處仲蘇峻所據之地也在豫章者卽韓退之次石頭驛詩也有兩石城一在金陵一在竟陵在金陵者卽左思所謂戎車次于石城是也在竟陵者卽莫愁所居之城也有三西塞一在金陵一在雪川一在武昌在金陵者乃石城西北之處在雪

川者張志和所稱願爲浮家泛宅往來苕霅間者在武昌者乃曹武成王用師之城今黃州上有西塞山是也

越絕書柴辟亭到語兒就李吳侵以爲戰地又云語兒鄉故越界名曰就李吳彊侵越地以爲戰地至于柴辟亭又云女陽亭者句踐入臣于吳夫人從道產女此亭養于就李鄉句踐勝吳更名女陽更就李爲語兒鄉水經注云東逕禦而鄉萬善歷曰吳黃武六年正月獲彭綺是歲由拳西鄉有產兒隨便能語云

天明河欲清脚折金乃生因是詔爲語兒鄉非也國語曰句踐之地北至禦兒韋昭曰越北鄙在嘉興是也今嘉興志語溪在崇德東南一名語兒中涇又名沙渚塘爲吳棲兵之地又錢塘有女兒橋亦此前漢書封棖終古爲語兒侯孟康曰越中地名後漢書南粵傳東粵使狗北將軍守武林樓船軍卒錢塘棖終古斬狗北將軍爲語兒侯師古曰錢塘會稽縣棖音袁孟康曰語兒越中地今吳南亭是也師古曰語或作禦或作籓音同侯鯖錄語兒梨果實之珍因其地

名也

高宗伐鬼方之事惟見于易鬼方極遠之國卽莫靡之屬也蒼頡篇云鬼之爲言遠也世本黃帝娶于鬼方氏漢匡衡疏云成湯化異俗而懷鬼方意者湯時鬼方已內屬於式圍之中而復叛於中衰之日故高宗伐之以中興殷道也又西羌傳曰殷室中衰諸侯背叛至於武丁征西戎鬼方三年乃克故其詩曰自彼氏羌莫敢不來王是其證也竹書紀年周王伐西落鬼戎按今貴州有羅鬼夷楚辭得人肉而祀以其骨爲醢紂醢脯九侯亦效夷虐也

岑參詩首宿峰邊逢立春葫蘆河上淚沾巾皆紀塞上之地也唐三藏西域志塞上無驛亭又無山嶺止以烽火爲識玉門關外有五烽首宿烽其一也然則今作峰者非也

漢史言匈奴漠南無王庭謂陰山之南黃河之北也陰山在山西陝西之北繞河流南折橫亘千里西出賀蘭東踰燕薊而抵醫無閭重山連阜峻嶺懸崖隔關北狄過此山後南北數千里東西數千里皆是砂

礫無水草名爲大磧虜駐此人畜皆乏食若不得據陰山之南必須踰此石磧而居其北北卽漠北也漠南無王庭者石磧之南陰山前後也

張良對高祖言長安形勝曰南有巴蜀之饒北有胡苑之利史記漢書皆不解胡苑之義後人或改苑作戎非也按漢官儀引郎中侯應之言曰陰山東西千餘里單于之苑囿也又胡人歌曰失我燕支山令我婦女無顏色失我祁連山令我六畜不蕃息所謂胡苑之利當是此義也

牧誓微盧彭濮汲冢周書伊尹爲四方獻令正南百濮鄭語楚蚡冒始啟濮劉伯莊曰濮在楚西南左傳麋人率百濮伐楚通典有尾濮木綿濮文面濮折腰濮赤口濮黑黠濮爾雅南至于濮鉛周書王會篇卜人以丹砂注云西南之蠻蓋濮人也諸濮地與哀牢相接今按哀牢卽永昌濮人今名蒲蠻其色黑折腰文面是其飾也濮與蒲字音相近而訛爾

宣和畫譜中載有拂林圖或作拂林又作拂菻不知所謂後考杜環經行記拂林在苦國西一名犁軒其

人顏色白婦人皆服珠錦善織絡琉璃妙天下蒜音
力甚切董北苑畫跋云拂林圖自唐有之其人類中
國婦人皆衣胡綾紺文雜錦戴金花步搖綴以木難
青珠盧肇雙柘枝舞賦云拂蒜妖姿西河別部蓋如
唐人之胡旋女元末之天魔隊耳

易井卦朱子解云井者穴地出水之處不曰鑿井而
曰穴地何也按中山經云帝囿山有井焉名天井孫
子兵法云地陷曰天井穴地出水蓋此類耳穴地之
井天所爲也鑿地之井人所爲也先天上古穴井後

天中古鑿井也

市井二字人有謂古者城分九區如井字公宮後列
爲市井者按後漢循吏傳中云白首不入市井注引
春秋井田記曰井田之義有五一日無泄天時地氣
二曰無費一家三曰同風俗四曰合巧拙五曰通財
貨因井爲市交易而退故稱市井也

左傳鄭伯肉袒牽羊以逆楚子曰云云使改事君夷
于九縣注楚滅九國以爲縣願得比之正義謂息鄧
弦黃夔江六蓼庸權申息凡十一國不知何以言九

沈重謂權是小國庸先屬楚自外為九也皆曲說不通竊意九為陽數之極故書傳凡言九者皆指其極也楚辭九歌乃十一篇亦止言九也如九陵九淵九攻九守皆可以此例推之後漢書云九縣颺回正用此語無費一毫二曰同風命四曰合

左傳九丘八索九丘即九州也八索即八澤也見淮南子或以八索為八卦謬矣通鑑外紀云人皇氏依山川土地之勢財度為九州謂之九圍各居其一而為之長人皇居中州以制八輔此引春秋命歷叙文

也九圍取育草木為義即後世所謂九州也中州則人皇之都石鼓文所謂寓逢中圍也八輔則餘八圍也圍亦作有古字省文書書以有九有之師詩九有有截又奄有九有作九圍解之義尤明暢左傳謂之九藪陽紆雲夢之屬

周禮九藪揚州具區荊州雲夢豫州圃田青州孟豬一曰望諸兖州大埜雍州弦蒲幽州獫狁冀州陽紆并州昭餘祁爾雅又有十藪魯大野晉大陸秦楊陁宋孟諸楚雲夢吳越具區齊海隅燕昭余祁鄭圃田

周焦獲淮南子九藪曰越之具區楚之雲夢秦之陽紆晉之大陸鄭之圃田宋之孟諸齊之海隅趙之鉅鹿燕之昭余盛與周禮所載不同也

王子年云禹治水所穿鑿處皆有泥封記使玄熊升其上此封堠之始按北堂書抄引山海經黃帝遊幸天下有記里鼓道路有記里堆則堠起黃帝非始于禹也

詩町疇鹿場毛萇云鹿跡也說文曰町疇禽獸所踐處蓋因町疇下有鹿場字遂以鹿跡獸踐附會之鹿跡獸踐可以解鹿場不可以解町疇也原詩人之意謂征夫久不歸家町疇之地踐爲鹿場非謂町疇卽鹿場也且說文以町疇字載於田部曰凡田之屬皆以田若町疇果爲獸踐則非田之屬也考之他訓左傳町原防井衍沃千寶注平川廣澤可井者則井之原阜堤防不可井者則町之町小頃也張平子西京賦徧町成篁注町謂畝畝王充論衡町町如荆軻之廬石鼓文原隰旣垣疆理疇疇毛伯敦銘予旣疇商莊子舜舉于童土之地其疏云童土疇也皆說田野

並無鹿跡之說也

四海之邊中國者在山東則爲東海在廣南則爲南海人人聞見若禹迹所及西境流沙而不言西海東北嘗至碣石而北海之名不著于經則謂外薄四海訖于四海者如之何而四也漢武帝使命方行四表故西北二海遂有身歷而目擊之者於是條支之西有海焉先漢使命固嘗見之而入諸史矣後漢班超又嘗遣甘華輩親至其地至於西海之西又有大秦國焉卽波斯也夷人之與海商皆嘗往來若夫北海則又

其甚遠者而霍去病之封狼居胥山也其山實臨瀚海者北海也蘇武郭吉皆爲匈奴所幽寘諸北海之上而唐史所載又曰突厥部北海之北更有所謂骨利幹之國焉在海北岸然則諸書所稱四海者實皆環夷夏而四之非寓言矣若夫西北二虜有西海栢海青海蒲類海蒲菖海居延海白亭海鮮水海皆嘗並海立稱然要其實致則衆水鍾爲大澤如洞庭彭蠡之類故借海以名之非真海也李吉甫辨白亭海而曰河北得水便名爲河塞外有水便名爲海其說

確也班固叙張掖之水曰羗水出羗中東北至居延入海則真以居延為海矣

楚辭天問東流不溢孰知其故柳子之對朱子之註大抵以歸墟為說夫水由氣而生亦由氣而滅今以氣噓物則得水又以氣吹水則即乾由一滴可知其大也歸墟尾閭是水之大窮盡氣之大升降處山海經云汜天之山赤水窮焉不姜之山黑水窮焉朽音塗之山青水窮焉不庭之山榮水窮焉成山甘水窮焉則眾流各有窮處至此即化氣而升不必至歸墟

也又莊子云日之過河也有損焉風之過河也有損焉風日皆能損水但甚微而人不知覺若裸衣於日中標濕於風際則立可驗此隨時而消息也覆杯水於坳堂則立而乾洒激泉於焦原則立而涸此隨地而消息也

禹貢載敷淺原蓋江鄂之間孔氏謂一名博陽山顏師古云博當為博漢志豫章歷陵縣南有博陽山博陽川在南古文以為敷淺原音為敷陽誤為博爾水經注云敷淺原地在豫章歷陵縣西南水經所載禹

貢山水澤地凡六十山指名曰山水指名曰水而稱地者四流沙九江東陵敷淺原也孔顏以為山者異矣按通典云蒲塘驛漢歷陵縣有敷淺原西十里有博陽山以今縣南十三里有陽居山舊經依固以為敷淺原名博陽山然縣境惟有一水流入大江人謂博陽川乃在此山東北與志不合杜佑復析敷淺原博陽山為二蓋以敷淺原之水也

十道四蕃志敷淺原博陽水俱在饒州九江新舊博陽錄記顏魯公過蒲塘驛辨土俗所呼蒲淺水蒲敷音之轉南有博陽山土人呼濮陽山濮博亦音之訛則博陽之山不得而實爾按驛西數又以為博陽矣

十里惟有一望夫山蓋望敷爾博陽志博陽山在德安縣南十三里望夫山在德安縣西北十五里高一百丈謂升此望敷也隋志湓城望夫山或曰望君是也方輿記謂夫行役妻每登高而望箱土積高而為名然寰宇記巴陵當塗黎德安皆有望夫之山俱以婦人為說謬矣志言邑人或謂縣古有敷淺原登此可以望之故名望敷以今山下近村猶以敷裏敷外為名斯得之矣蓋望都之類爾今崇陽之西二百二十有雲溪山峭峻清流界道如帶即所謂敷淺原也

非博陽山

揚州文有三江而導水之文乃有中江北江釋者於是紛紛孔謂江自彭蠡分三以入震澤而鄭復以東迤爲南江歷代不決不知所謂三江非中北之江中北之江初無三江之名而三江元不入震澤也職方三江揚州之川郡國志韋昭等以吳郡南松江浙江浦陽江爲之按此皆自會稽入海者自班固冒以南中北之名遂與岷漢入滙之名文相亂故或者疑南松等爲是吳中小水不足名川于以岷漢克之故志

林云江於彭蠡分爲三以入海然江自夏口合漢以入彭蠡卽合爲一自蕪湖出繇秣陵京口至崇明入海何嘗有三桑欽許慎謂江至彭蠡石城而分爲二一爲中江今大江一爲北江浙江也然浙出于黟至餘姚定海而入海與長江正自隔絕故漢注又爲岷爲大江至九江爲中江至徐陵爲北江是一源而三日豈其然邪夫贛源于西章本曰豫水豫章之名始此而西章明有江南之號則亦可謂三江特此一江禹所不至禹貢不見學者有不之知夫以震澤在吳

彭蠡在楚略不相及今乃謂江自彭蠡分入震澤爲
北江是誤以揚州之文解之也三江旣入震澤底定
者謂三江旣入于海而震澤亦以致定此自二事非
謂其入震澤此鄭所以謂三江分于彭蠡爲三流東
入海然謂分爲三流則愈踈矣且雷夏旣澤灘沮會
同雷澤在交灘沮在雍交東雍西亦自二事而安國
亦以爲二水會同於此澤蓋不知地理之所至也然
又攷之海內東經會稽之山在大楚南三江之首大
江出岷山海江出蔓山南江出高山高山在城都西
皆入于海故郭景純以岷江易浦陽今人特不知其
處爾學者又何可妄引淺證而罔之哉

蔡沈黃震說三江皆於下流求之名以地訛號隨世
改恐非禹貢之三江也按徐鉉注說文云江出嶧山
至楚都名南江至潯陽爲九道名中江至南徐州名
北江入海郭璞山海經注岷山大江所出也崶山南
江水所自出也嶧山北江水所自出也三江皆發源
於蜀禹貢紀其源而及其委耳

導山之文自岷山至衡山過九江至于敷淺原而導

江自岷山至于澧過九江至于東陵東迤北會于滙東陵今之巴陵與夷陵相對出爲東西以夷陵曰西陵則巴陵爲東陵信矣故唐志以今鄂州巴陵爲是九江蓋在東陵而上顧不在彭蠡下也按荊州文九江孔殷鄭氏以爲殷者多也謂九江從山溪所出其孔甚多以言治之之難九江各源其下流合于江而非大江孔安國言江於荊界分爲九道應劭遂以爲自潯陽分班氏之志則以爲在潯陽縣南皆東合于大江而以東陵爲在廬江金蘭水經亦云金蘭西北

以廬江郡有東陵鄉也不知金蘭乃在滙之下流非大江之所至許叔重云迤邪行也今江水過洞庭至于巴陵而後東北邪行入于彭澤所謂至于東陵東迤北也豈潯陽之區哉且以大水受小水謂之過二水相受大小均謂之會河水東過洛汭北過洛水洛之水入河河水過之而已漾過三澨渭過漆沮亦猶是也自江分爲九道則經當云播爲九江不云過矣九江舊說一畝二白蜺三嘉靡四烏土五蚌六盭七麇八沙提九廩爲之或百里或五十里始于鄂陵

而會于京口桑落州三百餘里而張須元九江圖乃有三里五洲白蚌菌州之名五洲卽蜺而三里卽畝也潯陽記則以爲一鳥二白蚌三鳥土四嘉靡五畝六源七廩八提九菌源或作浮鳥土一作鳥白水經書疏莊子義等往往皆引爲正晁百揆以爲方俗所名於經無當桑落州今在宿松西南百餘里十道四番志云江自鄂陵分派爲九于此合流謂之九江口又云潯陽江有八洲一沙二人三九江四葛五象六鳥七感八蚌曲折爲九江洲與江洲潯陽中流分界

東武林洲洲之下尾故程大昌謂荆境至潯陽以東卽爲揚州孔應所以附會屬之別無古据安國言爲九派未有其名至張僧鑒張須元賈耽名而不同蓋出俗傳江何嘗九分哉逮蔣之奇乃以九江爲今洞庭宜亦有所見矣竊考漢志東陵之間自有沈漸沅辰叙酉澧湘資九水皆合洞庭東入于江山海經云洞庭之山是在九江中而博物誌君山爲洞庭山故張勃吳錄云岳之洞庭荆之九江也若潯陽則爲揚境非荆地矣水經注言九江在長沙國不雋縣西北

楚地乃今岳之巴陵洞庭在其西北則荆之九江爲
洞庭審矣雖然秦漢以壽春置九江郡殊失所謂及
英布爲九江王而王莽更以豫章爲九江郡劉歆以
爲湖陵九江入彭澤禹貢爲辭也太史公云予登廬
山觀禹迹九江口安得古之九江而觀之蓋自秦漢
說者知潯陽爲九江爾惠遠記廬山在潯陽南南濱
宮亭北對九江而潯陽志九江在州西北二十五里
皆率然之說爾太康地記以爲湖漢元水入彭蠡蠡者
則又入贛之九水也益遼隔矣

又攷九江蔡註據水經以沈水漸水元水辰水敘水
酉水澧水資水湘水爲九江仁山金氏辯之以爲此
九水惟澧水自入洞庭餘皆合沅水北流然禹貢東
至于澧過九江則是澧又當在九江之外乃考朱子
文集漢史江陵新志更定九江謂一曰瀟江二曰湘
江三曰蒸江四曰澧江五曰沅江六曰漸江七曰序
江八曰辰江爲九江近世方麓王氏又以爲九江爲
洞庭禹貢至于澧過九江澧水出今岳州慈利縣岳
州卽古巴陵郡江水過澧州始經洞庭之口今荊州

之水莫大於洞庭而爾雅十藪惟云楚有雲夢而不及洞庭周禮職方氏荊州其藪澤曰雲夢而亦不及洞庭戰國策載吳起言左洞庭右彭蠡又秦與荆戰大破之取洞庭五瀦則洞庭之名戰國時已有之然旣言洞庭又言五瀦則是洞庭山之側有此五瀦分而爲五亦可以證其未合而爲一也想因九江同此入江故名九江後旣瀦九而爲五又會五而爲一則九江遂皆入湖而洞庭之名始著九江五瀦之名隱矣

曲江有三枚乘七發云觀于廣陵之曲江今蘇州也廣東有曲江今韶州也司馬相如吊二世賦云臨曲江之墜州卽長安也按唐劉餗京師傳記云京師芙蓉園本名曲江園隋文帝以名不正改之故杜子美詩云曲江翠幙排銀榜又云春日潛行曲江曲七發所謂曲江弭節也

碣石有二一在廣東南海口一在冀州北海口北碣石在海中如河中砥柱當河入海之衝鎖中國水口真天造也河旁地淪於海碣石遂去岸五百里其地

今爲遼東西南小海其西卽冀河入海故道山海關至薊州豐潤一帶是也未有小海時遼東亦不屬交者蓋須入山海關從永平薊州方至交遠矣若屬青州片帆可達故唐虞時遼東今遼陽屬青遼西今廣寧屬冀自九河淪海而交地甚狹矣

黃河援神契黃河者水之伯上應天河酈道光水經云河源出崑崙之墟山海經崑崙縱橫萬里高萬有一千里有青白赤黑河環其墟其白水出東北陬屈向東南流爲中國河百里一小曲千里一大曲發源

及中國大率常然爾雅河出崑崙墟色白由此言之今之黃河所謂白河也而物理論乃云河色黃赤何也又黃河九曲其說出河圖絳象云河導崑崙山名地首上爲權勢星一曲也東流千里至規其山名地契上爲距樓星二曲也邠南千里至精石山名地肩上爲別符星三曲也邠南千里入隴首間抵龍門首名地根上爲營室星四曲也南流千里抵龍首至卷重山名地咽上爲卷舌星五曲也東流貫砥柱觸闕流山名地喉上爲樞星以運七政六曲也西距卷重

山千里東至雒會名地神上爲紀星七曲也東流至太岨山名地肱上爲輔星八曲也東流至絳水千里至大陸名地腹上爲虛星九曲也元學士潘昂霄河源志黃河九折胡地有二折蓋乞兒馬出及必赤里也禹貢導河自積石以此參攷之絳象圖及河源志與禹貢一一皆合

禹貢導河止自積石而漢使張騫持節通西域度玉門見二水交流發蔥嶺趨于闐匯鹽澤伏流千里至積石而再出唐薛元鼎使吐蕃訪河源得之于悶磨黎山皆歷歲月涉艱難而其所不得不過如此世之論河源者又皆推本二家其說怪誕總其實皆非本真意者漢唐之時外夷未盡臣伏而道路未盡通故其所往不無迂迴艱阻不能直抵其處而究其極也元有天下薄海內外人迹所及皆置驛傳使驛往來如行國中至元十七年命都實爲招討使佩金虎符往求河源都實旣受命于是歲至河州州之東六十里有寧河驛驛西南六十里有山曰殺馬關林麓窮隘舉足浸高一日至其巔西去愈高凡四閱月始抵河

源是冬還報并圖其城傳位置以報其後翰林學士
潘昂霄從都實之弟濶濶出得其說撰爲河源志臨
川朱思本又從八里吉思家得帝師所藏梵字圖書
而以華文譯之與昂霄所志互有詳略今取二家之
書考定其說有不同者附注于下按河源在吐番朶
甘思西鄙有泉百餘泓沮洳散渙弗可逼視可方七
八十里履高山下瞰燦若列星名火敦腦兒卽星宿
海也朱魚本曰河源在中州西南直四川馬湖蠻部
之正西二千餘里雲南麗江宣撫司之西北一
千五百餘里帝師撒思加地之西南二千餘里水從
地湧出入井其井百餘東北流百餘里匯爲大澤曰

星宿海

羣流奔轉近五七里匯二巨澤名阿刺腦兒自
西而東行一日迤邐東鶩成川曰赤賓河又三日水
西南來曰亦里出與赤賓合又四日水南來曰忽蘭
又東南來曰也里朮合流入赤賓其流浸大始曰黃
河然水猶清可涉忽蘭河源出自南山其地大山峻
嶺綿亘千里水流五百餘里注也
里河也里出河源亦出自南山
西北流五百餘里與黃河合又二日岐爲九股曰
也孫榦倫卽九度通也廣六七里可渡馬又五日水
渾濁土人抱革囊騎過之聚落糾木榦象舟傳髦革
以濟僅容二人自是兩山峽束廣可一里二里或半

里其深叵測矣朶甘思東北有大雪山名亦耳麻不

莫刺其山最高譯言騰乞里塔即崑崙也山腹至頂

皆雪冬夏不消土人言遠年成冰時六月見之自九

股水至崑崙行二十日自渾水東北流一百餘里與懷里火禿河合懷里火禿河

源自南山正北偏西流八百餘里與黃河合又東北流一百里即麻哈地又正北流一百里乃折而西北

流二百餘里又折而正北流一百餘里又折西而東流過崑崙山下番名亦耳麻不刺其山高峻非常山麓綿亘五百餘里河隨山足

東流過撒思家即濶濶提地河行崑崙南半日程地

又四五日至濶即及濶提二地相屬又三日至哈刺

別里赤兒四達之衝也多寇盜有官兵鎮之近北二

日河水過之河過濶提與亦西八思今河合亦西八思今河源自鐵豹嶺之北正北流凡五百餘里而

與黃河合崑崙以西人簡少多處山南山皆穹峻水

溢散漫獸有髦牛野馬狼狽辣羊之類其東山益高

地亦漸下岸狹隘有狐可一躍而越之處行五六日

有水西南來名納鄰哈刺即細黃河也哈刺河自白狗嶺之北水

西北流五百里與黃河合又二日水南來名乞兒馬出二水合流

入河自哈刺河與黃河合正北流二百餘里過河以

里馬出河合乞里馬出河源自威茂州之西北岷山之北水北流之古當州境正北流四百里折而西北

流又五百餘里與黃河合河水北行轉西流過崑崙北一向東北

流又半月至貴德州地曰必赤里始有州治官府州

隸吐番等處宣慰司司至河州又五日至積石州即

禹貢積石又五日至河州安鄉關一日至打羅坑又

東北行一日至洮河水南來入河自乞里馬出河與黃河合又西北流

與鵬梭河合鵬梭河源自鵬梭山之西北水正西流

七百餘里過禮塞塔失地與黃河合折而西北流三

百餘里又折而東北流過西寧州貴德州馬嶺凡八

百餘里與邈水合邈水源自青唐宿軍谷正東流五

百餘里過三巴站與黃河合又東北流過土橋站古

積石州來羗城廓州構米站界都城凡五百餘里過

河州與野龐河合野龐河源自西傾山之北水東北

流凡五百餘里與黃河合又東北流一百餘里過踏

白城銀川站與湟水浩豐河合湟水源自祁連山下

正東流一千餘里注浩豐河浩豐河源自剛丹州之

南剛丹山下水東南流七百餘里注湟水然後與黃

河合又東北流一百餘里與洮河合洮河源自羊撒

嶺北東北流過臨洮府又一日至蘭州過北卜渡至

凡八百餘里與黃河合

鳴沙河過應吉里州正東行至寧夏府南東行即東

勝州隸大同路自發源至漢地南北澗溪細流旁貫

莫知紀極山皆草石至積石方林木暢茂世言河九

折彼地有二折蓋乞兒馬出及貴德必赤里也自洮水與

河合北流過達達地凡八百餘里過豐州西受降城

州東南流通陝西省綏德州凡七百餘里與黃河合
 又南流三百餘里與延安河合延安河源自陝西蘆
 子關亂山中南流三百餘里過延安府折而正東流
 三百里與黃河合又南流三百里與汾河合汾河源
 自河東朔武州之南亂山中西南流過營州冀寧路
 汾州霍州晉寧路絳州又西流至龍門凡一千二百
 餘里始與黃河合又東南流二百里過河中府過潼
 關與太華山綿亘水勢不可復南乃折而東流大槩
 河源東北流所歷皆西番地至蘭州凡四千五百餘
 里始入中國又東北流過達達地凡二千五百餘里
 始入河東境內又南流至河中一
 千八百餘里通計九千餘里焉

祝穆方輿勝覽曰天下之大川以漢名者二班固謂
 之東漢西漢而黎州之漢水源于飛越嶺者不與焉
 固之所謂東漢則禹貢之導漾自嶓冢山徑梁洋金

房均襄郢復至漢陽入江者也西漢則蘇代所謂漢
 中之甲徑舟出于巴乘夏水下漢四日而至五渚者
 其源出于西和州徼外徑階沔與嘉陵水合俗謂之
 西漢又徑大安利劔果合與涪水合入于江

宋劉裕遣朱齡石伐蜀寇譙縱衆軍悉從外水取成
 都臧儔從中水取廣漢老弱乘高艦從內水向黃虎
 史炤通鑑釋文曰巴郡今之重慶正對二水口右則涪內

水左則蜀外水自渝上合州至綿州曰內水自渝上
 戎瀘至蜀謂之外水按外水即岷江自重慶上叙州

嘉定是也內水卽涪江自重慶上合州遂寧潼綿是也中水卽沱江自瀘州上富順資簡金堂漢州是也曰四川者則取岷江沱江黑水白水四大川以爲名

爾

沈約宋書資江爲中水涪江爲內水

五湖之說有二周禮揚州其浸五湖國語與我爭三江五湖之利者非吳耶史河渠書於吳則通渠三江五湖貨殖傳曰夫吳有三江五湖之利太史公自叙曰登姑蘇望五湖此五湖者卽具區也其派有五故曰五湖一名震澤一名笠澤張勃吳錄云五湖者太

湖之別名以其周行五百里三萬六千頃故以五湖名義興記太湖射湖貴湖陽湖洮湖爲五湖酈道元水經注謂長塘湖射貴湖上湖漏湖太湖爲五張守節史記正義云菱湖游湖漢湖貢湖胥湖皆太湖東岸五灣爲五湖虞翻云太湖有五道東通長洲松江南通安吉霅溪西通宜興荆溪北通晉陵漏湖西南通嘉興韭溪陸魯望云太湖上稟咸池之氣一水而五名其名大同小異皆禹貢之所謂震澤也王勃文襟三江而帶五湖則總言南方之湖洞庭一也青草

二也鄱陽三也彭蠡一名崑亭湖四也太湖五也

即禹貢滙澤

黑水諸儒之說不一程泰之辯之甚悉其一孔穎達
援酈道元所釋水經有曰黑水出張掖雞山南流至
燉煌過三危山南流入于海程尚書以為此說出於
許叔重而增益以入南海者道元也蓋南海者交趾
二廣之海漢張掖者唐之甘州而燉煌者沙州也甘
州之水皆入積石河河流竟東則其水已非南向况
積石既在其南亦自無緣可以截河南過也程氏之
言似為有據然水之在雍州今名黑水者有六若以

為入積石河則是平涼及寧夏衛之黑水而非張掖
之黑水也今輿地圖肅州有黑水南流去積石幾及
三百里不與積石河相通此為禹貢之黑水無疑但
其去南海遼遠而交南久棄無從考其入海之道咸
通中樊綽宣慰安南親行西南諸夷著為蠻書以載
其所親見山川曰蠻水之南入于南海者凡四區江
西珥河麗水瀾澆水皆羅絡西南諸夷西南入海其
間有麗水者古黑水也但綽所案行者西南諸夷而
未及於西北其所稱麗江程氏以為西行入驃始得

至南海是得其下流而不知其上源之爲何如乃程
又不取其所稱麗水而指其所稱西珥河謂與漢志
榆葉澤相貫榆葉漸漬成黑又引古黑水祠在益州
者爲証不知此黑水乃成都安縣南之黑水而非禹
貢之黑水也至元金仁山又謂西南諸水合而爲瀘
水夷人謂黑爲瀘瀘水卽黑水也經過雲南但名瀘
水至交趾又名歸化水廣處如江東南入海而海道
圖自名黑水口按四川行都司城南有瀘山卽瀘水
所出今雍州多黑水尚不知的在何處而乃欲以瀘
爲黑又考交趾海口並無所謂黑水口則金氏之言
尤不足信也

禹貢貢道皆曰浮于惟冀州無貢道止書島夷衣服
夾石碣石入于河蓋島與碣石字相聯書知爲海夷
貢道若梁州厥貢惟璆鐵銀鏤斨磬熊羆狐狸織皮
西傾因桓是來當作一節浮于潛四句是一節梁州
是今四川兼有陝西漢中金沔鞏昌西和成縣秦州
湖廣施州等地若貢物俱從西傾而來是東南至西
北登舟矣西傾因桓是來止言織皮出處與所由來

也潛亦非一梁州三十六江皆是隨處登舟都到沔
 車行入渭又舟行也雍州厥貢惟球琳琅玕織皮崑
 崙析支渠搜西戎卽叙當爲一條浮于積石四句爲
 一條西傾在今臨洮府一云洮卽桓西戎卽叙猶青
 州厥貢條中有萊夷作牧也

夏書兗水東流爲濟入于河溢爲滎又東出陶丘北
 此伯禹所知也歷古地書皆知濟自河北温
 縣入河自河南滎陽而溢 兗濟二

郡正以是名濟源縣在河東濟南濟北濟陽濟陰皆
 在河南自杜預謂濟繇滎陽東過魯之西至樂安入

海交出王屋入河始釐爲二而杜佑李吉甫樂史竇
 革鄭樵輩遽援後志謂濟自莽末旱塞不復截河南
 度而以水經依取禹貢爲疏故唐高宗問許敬宗禹
 浮濟漯達于河何今濟漯斷不相屬對曰兗濟自温
 入河汝地南出爲滎澤又汝而出曹濮之間汶水從
 南入之故書又言浮汶達濟不言合漯漯自東武陽
 至千乘入河也漯自濟泲至東武陽入河今莘
 縣北此水非濟水入河也 敬宗

蓋亦本孔與河並驅而截河溢出之意不知其時無
 復滎水汨出滎口者滎陽水受河流石門涓之滎口
 滎澤在今滎澤縣北四十

謂濟南諸名爲出不審是一蔽也佑說河南之濟使禹所命或以性同或一時衆流湊泛濟適溢從河南以出而名又奚必泆流之說然禹必不以一時暫溢之名移疑後世夫水之所出自以不同固有入而不合行而復出者昔郭緣之於河上源遇書生問之何知濟與河上源通生曰洛水淬劔正與河水上源不異物之不同猶鉛錫也北濟旣入于河性與河別不能合混滲漉入地泆行達滎陽而遂溢爲滎爾今之歷下等處發地悉是流水濟所過也東阿之井正濟

所溢故今阿膠止濁住吐下膈而踈痰以濟之性趨下清而下重故治淤濁逆上之病以今油水固不同情九夏之辰冷熱之風亦各爲隧豈爲必無水過水哉涇渭分曹南零會地此理不少鄭樵謂山過山則分水過水則合世無山過山水過水之理謂漢入于江其文止此下有脫文堯入于河其文亦止于此而溢爲滎之上當更有道洸水數句說經不通不以爲脫必以爲誤此書生之篤疾也林之奇以爲漢入江濟入河皆合而流大禹導水自此開以支引之故猶

蒙上之名亦以淺鄙測聖人者庭州霸水金鐵皆漏

庭州灞水滴滴以手及金鐵器承之皆漏惟瓠葉則

否拘夷山中有流水下如飴亦然復之晁毛落而仙

曰駝溺去屯煌二萬里道安西域鄜延之河日夜流

記云石駝溺其國有婆羅門守視鄜延之河脂鄜延境內有石油舊說高奴縣出脂水即此水際

然之如麻烟甚濃重沈括取掃為墨松脂不及所謂

延川石液者石炭烟亦大黑人衣延川詩所謂二郎

山下雪紛紛石弱水溺毛黑溪玄髓悉唐制角西海

烟多似洛陽塵出如脂而黑金鐵承皆滲去惟角可貯南人以塗

木上象至輒不去崑崙以塗身即乘之如家畜畔

怯腐手婆羅門有畔茶怯水出山石坎中七色或冷

或熱能消金石草木手探亦腐取以駝骨石

人守蓋亦謂之無哉

孔明出師表五月渡瀘今以為瀘州非也瀘州古之

江陽而瀘水乃今之金沙江亦曰黑水其水色黑故

以瀘名之耳沉黎古志孔明南征由今黎州路黎州

四百餘里至兩林蠻自兩林南瑟瑟部三程至雋州

十程至瀘水瀘水四程至弄棟即姚州也今之金沙

-5 175 45 915" data-label="Text">

江在滇蜀之交一在武定府之江驛一在姚安之左

-55 175 5 915" data-label="Text">

却據沉黎志孔明所渡當是今之左却也瑟瑟一作

-105 175 55 915" data-label="Text">

虱琶兩林今之邛部長官司也

-155 175 105 915" data-label="Text">

荆州府志載夷陵州有浣紗河其說云昔伍子胥奔

-205 175 155 915" data-label="Text">

各

-255 175 205 915" data-label="Text">

卷之三

-305 175 255 915" data-label="Text">

三

言明 卷之三
吳道遇浣紗女卽其地也其水色班白若浣紗之色
後人立子胥廟於此按吳越春秋伍員初逃楚難聞
太子建在宋奔往就之旣而奔鄭會鄭人殺建乃與
建子勝奔吳越昭關至江漁父渡之遂行入吳疾於
中道乞食溧陽會女子繫綿於瀨水之上筮有飯女
子長跪而與之子胥已餐而去顧謂女子曰掩夫人
之壺漿無令其露女子嘆曰嗟呼妾獨與母居三十
年自守貞明不顧從適何宜餽飯與丈夫虧越禮儀
妾不忍也乃自投於瀨水而死後員入郢而還過溧

陽瀨水之上欲報女子以白金而不知其家乃投金
水中而去又按張勃史記註子胥乞食在丹陽溧陽
縣丹陽爲今應天府溧陽其屬邑也邑有投金瀨緣
伍員投金而得名唐時立貞女祠其上李太白爲之
記

陳陶詩可憐無定河邊骨猶是春閨夢裡人按無定
河在青潤縣東六十里南入黃河一名奢延水又名
銀水輿地記唐立銀州東北有無定河卽囿水也後
人因潰沙急流深淺無定故更今名又唐陳祐詩無

詩略 卷之三
定河邊暮笛聲赫連臺畔旅人情函關歸路千餘里
一夕秋風白髮生

韓文步有新船不知者改爲涉朱子考異已著其謬
蓋南方謂水際曰步音義與浦通孔戣墓志蕃舶至
步有下碇稅卽以韓文證韓文可也柳子厚鐵鑪步
志云江之滸凡舟可縻而上下曰步水經贛水西岸
有盤石曰石頭津步之處也又曰東北逕王步蓋齊
王之渚步也又云鸚鵡洲對岸有炭步今湖南有縣
名城步青箱雜記嶺南謂村市曰墟水津曰步曾步

卽漁人施罾處也張勃吳錄地名有龜步魚步揚州
有瓜步任昉述異記上虞縣有石駝步羅含湘中記
有靈妃步金陵圖志有邀笛步王徽之邀桓伊吹笛
處溫庭筠詩妾住金陵步門前朱雀航樹萱錄載臺
城故妓詩曰那看回首處江步野棠飛東坡詩蕭然
三家步橫此萬斛舟元成原常有寄紫步劉子彬詩
云紫步于今無士馬滄溟何處有神仙字又作埠今
人呼船僧曰埠頭律文私克牙行埠頭

東海中有弱水不勝鴻毛至則必溺故名又西海中

亦有弱水西海今西寧衛西二百里弱水在甘州之

西秦乞伏熾磐討吐谷渾覓地于弱水南大破之覓

地降署為弱水護軍又道經廣野山在北海弱水中

洪水滔天鮫竊帝之息壤以堙洪水山海經云帝怒

山息生之土長而不窮如出人息息肉故有息石高

勉息石詩字在江陵莊嚴寺或云韞玉漢元帝時臨滁地涌六里崇二

丈所哀帝之世無鹽危山土起覆章如馳道狀蓋息

壤也江陵之壤鑲鎮水旱江陵圖經引別錄云子城

之一夕輒復如故在昔傳昔高從誨鎮渚宮出經其

處萬勝門外問書記孫光憲對以伯禹治水自岷至荆定

彼泉源之穴慮萬世下有或泛溢爰以石屋鎮之蓋

本之冥洪錄裴相歐獻之事也元和初裴宙鎮荆掘

樓櫓悉倣荆城其中空徑六尺八寸甚工緻命徙之

藩籬間是春淫雨四月不止潦漲莫遏人抱為魚之

憂會歐獻乘居楚山馳問之對以事迫鑿石弗及令

陶範為江陵城內廣六尺八寸樓堞門闕無少差于

南門外八十步掘深六尺埋之當止宙始驚嘆昔人

所填從之既瘞祭之夕復隆起獻乃洛中道士博學

多聞亦見江陵志王子融修臧丙之事雷雨驟集爰屋而記

之貽救留者焉慶曆甲申尚書郎王子融洩渚宮自

及此以今地無復隆起而石屋簷且露請掘取驗雖

召水沴亦足為快因具畚鍤寘土數百石以備俟旦

從事是夕雷雨大至遠近沾洽亟以馨俎薦答醫博士張若水者年逾七十因言兒時見臧大諫丙嘗以久旱發之數尺巨石如屋四面為柱為牖其南隱出門闥之象百夫莫動乃糜以巨索率水兕二百蹄出之大雨而上未及窮其石城者因覆以屋後更為敞累壇繪為風雷之象陳堯佐不宜之易以龍神皇祐二年子融致仕始為蘇軾言其屢應然矣息壤詩序云崩有石

天地之間自多有此記謂不可犯畚鍤所及輒復如柳子所言龍興寺地故又頗致雷雨歲旱屢發有應

然鮓以埋水殛禹復用之彼以障汨而此以填後禍

也淮南子云禹以息壤埋洪水以生土封之意有後泄也

岑參熱海行云蒸沙爍石然虜雲沸浪炎波煎漢月

按玄奘西域記云凌山蔥嶺北隅坎雪積凌春夏不解懸釜而炊席米而寢七日出山有一清池亦曰熱海以其對凌山不凍故得此名也

江左今有莫愁湖在西城南按古樂府有莫愁樂石城樂唐書樂志曰石城有女子名莫愁善歌謠石城樂第二歌云陽春百花生摘插環髻前挽指蹋忘愁相與及盛年莫愁樂云莫愁在何處莫愁石城西艇子打兩槳催送莫愁來尚未詳也莫愁盧家女子善歌唱嘗入楚宮李商隱詩如何四紀為天子不及盧

詩明 卷之三
家有莫愁是也莫愁村今在承天府漢江西石城在
州西北晉羊祜所建鄭谷詩石城昔爲莫愁鄉莫愁
蒐散石城荒江人依舊棹舫艫江岸還飛雙死央王
橫詩村近莫愁連竹塢人歌楚此下蘋洲又沈佺期
詩盧家少婦鬱金堂卽此也按通考載梁武帝詩洛
陽女兒名莫愁云莫愁盧家女洛陽人則莫愁又有
兩人矣

吳泉卽虞淵見河圖絳象云邠之隘上爲扶桑日所
升宣陸之阻上爲吳泉月所登此僞書也虞綽逃難
易姓名作吳卓唐高祖諱淵後易作泉詩云酣歌一
夜送泉明是也

湖州有餘英溪餘不溪不今秋韻作方鳩切非也當
作虞韻風無切本作柎說文鄂足也草木房爲柎一
曰華下萼通作不詩棠棣之華鄂不韡韡鄭云承華
者鄂不當作柎鄂足也卽今言花蒂也此地有梅溪
茗溪其泥相通故曰餘英餘不其義可見矣若作方
鳩切則本注說文云不鳥飛上翔不下來與溪水全
不相干涉也

言明 卷之三 三十三
易澤中有火素問云澤中有陽燄如火烟騰騰而起
于水面者是也蓋澤有陽燄乃山氣通澤山有陰靄
乃澤氣通山木華海賦陰火潛然唐顧况使新羅詩
陰火暝潛燒是也東坡遊金山寺詩云是時江月初
生魄二更月落天深黑江心似有炬火明飛燄照山
栖鳥驚悵然歸臥心莫識非鬼非仙竟何物注引物
類相感志山林藪澤晦明之夜則野火生焉散布如
人秉燭其色青異乎人火按拾遺記東海有浮玉山
山下有穴穴中有大水蕩滴火不滅爲陰火正此類

也

禮運地出醴泉注王者政平醴泉湧出十洲記瀛洲
有玉膏山出泉如酒味名爲玉酒飲數升輒醉令人
長生應劭漢官儀曰酒泉城下有金泉泉味如酒故
曰酒泉述異記海上十洲一曰瀛洲有青丘翠水地
生玉酒飲之長生白孔六帖南昌國有酒山山有泉
其味如酒飲之甚美醉則經月不醒方輿記曰漢宣
帝聞谷口縣泉味如酒故以醴泉名縣醴泉縣志泉
在縣東南三十里周圍數十步深不可測圖經曰醴

泉在扶風鄉唐貞觀中復湧出其味如醴飲之可以愈疾又漢光武中元元年明帝永平十一年隋開皇二年唐天寶三年宋大中祥符元年熙寧元年政和五年並有醴泉出

野語曰邵康節曰世有溫泉而無寒火昭德晁氏解云陰能順陽而陽不能順陰也水爲火爨則沸而熟物火爲水沃則滅矣晉紀瞻舉秀才陸機策之曰陰陽不調則大數不得不否一氣偏廢則萬物不能獨成今有溫泉而無寒火其故何也白虎殿諸儒講論

班固纂爲白虎通五行篇亦曰有溫水無寒火然今湯泉往往有之如驪山尉氏駱谷汝水黃山佛迹匡廬閩中等處皆表表在人耳目坡詩云自憐耳目隘未測陽陰故鬱攸火山烈膚沸湯泉注安能長魚鱉僅可燖狐兔朱氏晦庵詩云誰然丹黃燄爨此玉池水蓋謂溫泉之下必有硫黃礬石故耳獨未見所謂寒火按西京雜記載董仲舒曰水極陰而有溫泉火至陽而有涼燄又抱朴子曰水性純冷而有溫谷之湯泉水體宜熾而有蕭丘之寒燄又劉子從化篇曰

水性宜冷而有華陽溫泉猶曰泉冷冷者多也水性
 宜熱而有蕭丘寒燄猶曰火熱熱者多也然則寒火
 亦有之矣特以耳目所未及故以為無耳

水之異者句容縣半湯湖其水同一壑而半冷半熱
 熱可淪雞皆有魚魚交入輒死石陽縣有井水半青
 半黃黃者如灰汁取作粥飲悉作金色氣甚芬馥崇
 寧一大井以片石開二竅累其上一竅汲以造餈一
 竅汲以為染若易竅汲之皆不能成其用恒山有雙
 龍泉相去僅丈許而一甚甘一甚苦壽州有咄泉人

至其旁大叫則大湧小叫則小湧咄之則湧彌甚無
 為州有笑泉湧出石底人有笑聲則泉益滾沸西寧
 衛有泉聞人足音即沸

司馬相如上林賦叙上林諸水曰丹水紫淵灞滻涇
 渭八川分流相背而異態灑灑潢潢東注太湖八川
 自入大河大河去太湖數千里中間隔太山及淮濟
 大河何緣與太湖相涉郭璞江賦云注五湖以漫漭
 灌三江而滿沛墨子曰禹治天下南為江漢淮汝東
 流注之五湖孔安國曰自彭蠡江分為三入于震澤

從爲北江而入于海此皆未嘗詳考地理江漢至五湖自隔山江乃遶出五湖之下流徑入于海何緣入于五湖淮汝徑自徐州入海全無交涉禹貢云彭蠡既豬陽鳥攸居三江既入震澤底定以對文言則彭蠡水之所豬三江水之所入非入于震澤也震澤上源皆山環之了無入川震澤之委乃多大川亦莫知孰爲三江也

水以漳名洛名者最多今略舉數處趙晉之間有清漳濁漳當陽有漳水瀨上有漳水鄆郡有漳江漳州有漳浦亳州有漳水安州有漳水洛中有洛水北地郡有洛水沙縣有洛水此槩舉一二耳其詳不能具載考其義乃清濁相蹂者爲漳章者文也別也漳謂兩物相合有文章且可別也清漳濁漳合于上黨當陽卽沮漳合流瀨上卽漳湏合流鄆郡卽西江合流亳漳渦合流雲夢則漳鄖合流此數處皆清濁合流色理如蟠螭數十里方混洛與落同義謂水自上而下投流處也

人有疑水肥石墨事者按地理志言高奴縣洧水上

有肥可用之博物志言酒泉南壽縣南山出泉水大如管注地爲溝水有肥如肉汁取著器中始黃後黑如凝膏然極明與膏無異膏車與水碓甚佳北方謂之石漆又云水肥水經注銅雀臺北曰冰井臺高八丈上有冰室室有數井深十五丈藏冰及石墨焉石墨可書又然之難盡亦謂之石炭陸士龍貽兄書三臺上曹公藏石墨數十萬斤云燒此消後可用然烟中人不知兄頗見之今送二螺卽此物也

唐六典述五行有命祿驛馬湓河之日按沈存中夢溪筆談曰余在鄜延見安南行營諸將閱兵馬籍有稱過范河損失問其何謂范河乃越人謂淖沙爲范河北人謂之活沙人馬履之百步之外皆動瀕瀕然如人行幙上其下足處雖甚堅若遇其一陷則人馬駝車應時皆沒至有數百人平陷無子遺者或謂此卽流沙也又謂沙隨風流謂之流沙湓字書亦作湓蒲濫反按古文湓深泥也因知術書有湓河者蓋謂陷運如今之空亡也

詩略今人亦云也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

詩者詩也文之宗也詩者詩也文之宗也

卷之三



